

DÎYÌ DYÀ CIMANYINU



Shaalaayi biimanyine kuulu anu bwa tusunsa tukese cyanaana mu Bwikadi bwa Mukalenge. Tubalaayi mu Dîyì Dyende, mu Ekesode, nshapita wa 4.

... *Môsà kwandamuna e kwamba ne: Kadi, tangila, bôbò kabaakungitabuuja to, anyi kabaakuteeleja dîyì dyanyi to: bwalu nebâmbè ne: MUKALENGE kî mmukumwenekele to.*

Ke MUKALENGE kumwambila ne: Cidi mu cyanza cyebe aci ncinyi? . . . wakamba ne: Dikombo.

Ke yêyè ne: Dyèlè panshi. Ke yêyè kudyela panshi, ne dyakandamuka nyoka; ke Môsà kubanga kunyeema kumpala kwende.

Ke MUKALENGE kwambila Môsà ne: Olola cyanza cyebe, nenku umukwate ku mukila. Ke yêyè kwolola cyanza cyende, ne kumukwataye, ke kwandamukaye dikombo mu cyanza cyende:

Bwa kwitabuujabo ne MUKALENGE Nzambi wa baataatu baabo, Nzambi wa Abraham, Nzambi wa Izaka, ne Nzambi wa Yakobo, mmukumwenekele.

Ke MUKALENGE kumwambila kabidi ne: Teeka mpindyewu cyanza cyebe mu cyâdi. Ke kuteekaye cyanza cyende mu cyâdi: nenku mmwenze anu ucyumusha, monaayi, cyôci kwikala nsudi anu bu nêjè.

Ke kwambaye ne: Teeka cyakabidi cyanza cyebe mu cyâdi. Ke kuteekaye cyakabidi cyanza cyende mu cyâdi; ne kucyumushaye mu cyâdi, nenku, monaayi, kwandamukaci cyakabidi bu muvwa mubidi wende mukwabo.

Nenku nebyenzeke ne, bôbò kabayi bakwitabuuje wêwè, anyi kabayi bateeleje ku dîyì dya cimanyinu cya kumpala, nebiitabuuje dîyì dya cimanyinu cya ndekeelu.

Nenku nebyenzeke ne, bôbò kabayi bakwitabuuje wêwè, bimanyinu bibidi ebi, anyi kabayi bateeleje dîyì dyebe, newangate mâyi a mu musulu, ne neùâmwange pa buloba bûme: nenku mâyi awikala mwangate mu musulu awu neandamuke mashi pa . . . buloba bûme.

² Twinyikaayi mitu yetu bwa disambila. Mpindyewu pawikala ne dilomba, mu diloolo emu, dyûdi ujinga kumanyisha kudi Mukalenge, ela anu byanza muulu wamba ne: “Mukalenge, wamvulukaku mpindyewu. Ndi ne dijinga.”

3 Taatu wetu wa mu Dyulu, nyewu tuseemena cyakabidi Kùdi diloolo edi, biikale bafike ku dyumvwa ne patudi twinyika mitu yetu panshi bayitangije ku buloba kutudi bafumine, ne, Wèwè munenge, netwalukile ku lupwishi. Kadi ne ditekemena dibenasha dya mulayi udi mu Kilisto, wa ne bõnsò badi mu Nzambi Kilisto nealwe naabo pamwe Nende. Tudi—tudi tuKusakidila bwa mulayi wa butumbi ewu. Nenku ndi ndomba, Nzambi, bwa Wèwè kuvuluka muntu ne muntu wa kudibo udi mwele byanza muulu, ne byanyi paabi, Mukalenge.

4 Ndi ndomba, diloolo edi, bwa ne mu nkomeni wa dîbà dya diitabuuja edi, upe bantu diitabuuja diloolo edi didi dyenza ne, Mukalenge Yesu neikale mulelela menemene kudi muntu ne muntu wa kutudi, bwa kakwikadi muntu ne butekete munkaci mwetu paanyima paa diloolo edi. Swaku bwa ngènzàmpèkààtù yõnsò afike ku dyumvwa ne udi mu Bwikadi bwa Mukalenge Yesu, ne pa dîbà adi anyingalale ku mpekaatu yende, ne afile mwoyi wende Kùdi, ne ujiibwe ne Nyuma, mu mèbà mabi a ndekeelu aa, patudi tucimona cifwanangane ne mundidimbi munenaanenaale wenda ulamba pa buloba.

5 Tudi tulomba, Nzambi, bwa bulombodi bwa Nzambi, diloolo edi, bwa dyakula ne diteeleja. Swaku bwa Nyuma Mwîmpè angate disangisha mpindyewu ne acibule Dyâmpà dya Mwoyi bwa muntu ne muntu wa kutudi bilondeshile dijinga ditudi naadi, bwalu tudi tubilomba mu Dinà Dyende. Amen.

Nudi mwa kusõmbaayi.

6 Ndi ne dyeyemena dya ne diloolo edi netwikale mwa kukumbaja citudi tuteeta bwa kwenza bwa bantu kumonabo, bu—bulelela bwa kwikala ne diitabuuja mu Nzambi.

7 Mpindyewu, maalaba mu mapingaja pa dîbà ibidi ne tusunsa makumi asatu, bõnsò biikala ne twarta twa disambila netubasambidile. Nenku pashiishe bwa kwikala mutwishiibwe ne kî nkushaale bantu, kabayi ne twarta twa disambila, diloolo dyõnsò tudi twabanya twarta twa disambila. Nenku yèyè neàtwábànyè cyakabidi maalaba, pa kwipacila. . .ngela meeji, pa kwipacila dîbà umwe ne tusunsa makumi asatu anyi cintu bu nanku, kumpala menemene kwa masangisha kubangawu. Nenku aba bõnsò badi ne dijinga dya kubasambidilabo, yõnsò wa ku bananga beenu, alwe apete karta kaa disambila. Ncya bushuwa ne neikale—neikale mwakidila bilenga bwa kupeta karta kaa disambila. Nenku netwikale mwa. . .

8 Nènsambidilè bantu, mu dibatentekela dya byanza ne dibasambidila. Mpindyewu piikala diitabuuja dyebe kadiyi mwa kubanda mu Bwikadi bwa Mukalenge Yesu ne kuMwakidila bu Mwondopi webe, ne witabuuja anu ne twètù bakusambidile ne bakutentekela byanza, aci necikukwacishe, ee, ncyà bushuwa ne tudi mwaba ewu bwa kwenza cyõnsò cinudi nujinga aci.

9 Kabingila kândi ntentemwina bwalu ebu too ne pa dîbà dipite, ntanta mule, mbwa kutabaleela ne muntu yônsò ûndi mufwanyine kusambidila awu, afike ku dyolola cyanza akwate Nzambi pa bishimikidi abi. Ne twêtù biine katwena tubangata bapitepите bûngi to. Kudi . . . Nzubu kî mmunene to, ne pa nanku katwena twangata bantu bapitepите bûngi to. Nenku tudi mwa kwangata mapingaja a maalaba ne kusambidila bônsò batudi naabo mwaba ewu aba, tuteeka mapingaja awu bwa kiipacila aku, bwa kusambidila babeedi.

10 Nenku tudi mwaba ewu mbwa kwenza cintu kana cyônsò citudi mwa kwenza bwa kunulengejilaku nsòmbelu ndambu, kunupeejilaku bujitu, mu lwendu lutudi twenda tuya emu.

11 Ne pathiishe pa dîbà kana dyônsò, didi muntu udyumvwa ne—ne udi ujinga kulwa kudi Mukalenge Yesu, nansha biikale ne ncitupa kaayi cya disangisha cidi munkaci mwa kwenzeka aci, wêwê lwâku anu pa dîbà adi. Kwindidi too ne piikala dibiikila dya ku cyoshelu ne cya kwenjiibwa to. Kwindidi too ne piikala kabeji kaa dibiikila ne cya kufidiibwa to. Wêwê lwâku anu pa dîbà adi, witabe Kilisto, ubande buludi kuneeku uMujikule anu pa dîbà adi mene. Bwalu aci ke kiipacila keetu kanene kaa diikala dyetu kaaba aka, nkaa kumona misuuka ileidiibwa mu Bukalenge bwa Nzambi.

12 Nenku mpindyewu, maalaba mmu dyalumingu, nenku nekwikale kalaasa kaa Dyalumingu, maekeleeziya. Cidi cyenza ne twikale ne etu masangisha mu mapingaja, mu dyalumingu, mbwa katwikadi mwa kupangisha nansha kakese disangisha kampana. Tudi twitabuuja ne mwena Kilisto yônsò ewu udi ne cya kwikala ne—ne ekeleeziya wa ne ke kwabo kumbelu kutuye uya. Bidi bikengela bwa mwena Kilisto yônsò ikale ukadisangishilaku mwaba kampana pamwe ne beena kwitabuuja. Nenku mwaba wônsò ûtù udisangishila awu, ke ekeleeziya nyêyê awu.

13 Mpindyewu, bu ne mvwa musòmbèle muneemu, mvwa mwa kwikala wa mu umwe wa ku ekeleeziya eyi mwaba ewu, idi bampaasata badi mwaba ewu aba, bakwacishangana mu mudimu, baleeja mpala wayi. Bwa cinyi? Bwalu badi mwaba ewu basòmbè pa cibumba cya ku cyambilu, bwa babamone kudi bantu bônsò ne, mbiitabe bidi munkaci mwa kwenzeka ebi. Badi biitabuuja mu mudimu wa bwambi wa mushindu ewu, dyondopa dya kudi Nzambi, dibatiiza dya Nyuma Mwîmpè, ne bikwabo. Badi mwaba ewu biikale bawufidila bujaadiki. Bôbò ke bavwa bambiikidishè bwa mêmè kulwa mwaba ewu, bwa ne pâmwâpa mudimu wa bwambi udi Mukalenge mumpè wamona mwa kukwacisha masangisha abo.

14 Mpindyewu ke mpaasata mulelela nyêyê awu, udi wenda ukebangana ne bipeta byônsò bya Nyuma bidiye mwa kupeta abi, bya cyônsò cidi Nzambi munkaci mwa dyenza abi, mwikale

uditacisha ne mwende mwônsò bwa kukwacisha ekeleeziya wende bwa kuyaye kumpala bwa Nzambi. Ncya bushuwa ne ntu ntuula cifulu cyanyi bwa kuneemeka mpaasata bu nanku awu.

¹⁵ Ne bantu aba bivwa bikengela kwenzabo ciine aci mu lutatu lukole, bôbò paabo. Nudi mwa kwitabuuja ne aci ncilelela. Bivwa bikengela kwenzabo ciine aci mu lutatu lukole. Nenku ndi—ndi ne kusakidila bulelela bwa balume ba Nzambi baa mushindu ewu, badi bajinga kwangata kaaba kaabo ne kaaba kaabo kaa mudimu pa bidibo batwishiiabwe ne mmudibi, kadi—kadi kwitabuuja. Nzambi ababeneshe kashidi!

¹⁶ Ne ndi mutwishiiabwe ne bôbò nebânwënzèlè bilenga. Mpindyewu, pawikala mwenyi mwaba ewu, keba upete mwaba udi bânà beetu aba ne ekeleeziya yabo, udibo basanganyiibwa. Nda ukabamwenekele maalaba. Nebiikale ne masangisha a pabwawu, ne kudi bambi mwab'ewu biikala mwa kuyiisha mu ekeleeziya mishiileshiilangane, mudibi bimanyishiabwe. Nanku nwikale kwabo aku maalaba.

¹⁷ Nenku pashiishe maalaba mu mapingaja, pawikala ujinga kupatuka kulwa mu disangisha dya nkomeni, ncya bushuwa ne tudi bafwanyine anu kwikala ne disanka dya kukwakidila. Ekeleeziya yônsò, mangumba ônsò, mbwa bantu bônsò. Tudi twakidila bantu bônsò: Méthodiste, Baptiste, Presbytérien, mwena Mpenta, mwena église de Christ, mwena église de Dieu, mwena Katolike, mwena Yuda wa Orthodoxe, ewu udi kayi witaba diikalaku dya Nzambi, nansha wêwè nganyi. Twêtù tudi. . . Udi mubiikidiabwe.

“Udi wamba ne: ‘Ewu udi kayi witabuuja diikalaku dya Nzambi?’” Eyowa’s, mukalenge.

¹⁸ Piikala muntu udi kayi witabuuja diikalaku dya Nzambi ujinga kulwa mu disangisha ne kusômba mwikale mudipope, tudi tumwakidila anu bu muntu mukwabo yônsò ewu. Cya bushuwa. Cintu kampanda, ke citudi tumukebela kaaba aka, bwa cintu kampanda cifwanyine kwenjiibwa cidi mwa kumukwacisha bwa kumonaye cilema cyende, nenku kulwaye kudi Mukalenge. Bwalu twêtù. . . Cya bushuwa.

¹⁹ Mbanganyi bakaadiku babale kaacikeena-kumona kakese kadi cikandakanda cya Beena Kilisto baa Kantu-ku-byanza bapatule, ne ndi ngitabuuja ne ndambu mukwabo wa bikandakanda. . . , wa, *Kutàngila Dyàmwàmwà Dyà Rìdô Wa Cikondo?* Mpindyewu aci ncilelela, mulunda wanyi. Kabyena bikengela bwa wêwè kucipangila to. Mêmè—mêmè ngâkashààla muntu mupyamupya kubangila anu piine apu. Ndi mumanye ne ncilelela, pa nanku ndi—ndi—ndi ne dyeyemena ne muntu nansha umwe wa kunudi kaakupangila Dyulu dinene didi Nzambi muteekele beena kwitabuuja adi to. Wêwè mupangile, cyûdi mukumbaje pa buloba apa ncinyi? Bwalu, kwèna mumanye ne ncikondo kaayi ciwapeta bwa kuumuka

pa buloba ebu to. Kadi udi mumanye cintu cimwepele ne, udi mutwishiibwe ne newikale ne cya kuumukapu. Nenku piikalaci cilelela, nanku katwena bafwanyine kwikala batambe kukutakana pa ku—kuteeta kupeta anu . . . Kabyena bikengela bwa twètù kunaya ne mudilu to. Udi umona's, vuluka anu ne, witabuuje Dìyì dya Nzambi ne mulayi wònsò udi mu Dyòdi adi.

²⁰ Anji ela meeji, ncinyi cyakakeba disaama dyònsò, dibungama dyònsò dikole edi, lufu lwònsò, lutatu lwònsò elu, tunyinganyinga twònsò, mwànà mukese wa disaama dya tukulakaji, bintu byònsò ebi, balema, bampofo, lupiitaadi lwònsò ludi lukengela kwibakiibwa elu? Mbwalu muntu umwepele wakabenga kwitabuuja anu katupa kakese cyaanaa kaa Dìyì. Uvwa ng'Eva. Sataana uvwa anu mumupeesheci ciswikila mu dibuki. Kavwa mumuteeleleci to, uvwa mumupeesheci ciswikila mu dibuki, wamba ne: "Ncya bushuwa ne . . . Mukalenge utu mwímpè mutambe."

²¹ Nutu nucyumvwa bikole leelu ewu ne, Nzambi utu Nzambi mwímpè. Utu Nzambi mwímpè, kadi wavuluka ne utu Nzambi wa cijila, Nzambi udi kayi mwa kumona mpekaatu bu udi kayi mumumone to. Cibawu ncimana kufuta, nenku bikengela ùcítàbè bilondeshile Wende mmwenenu. Kabidi wavuluka ne, Yèyè n'Nzambi wa cijji, Nzambi wa cijji cikole. Nenku newimane kumpala kwa Nzambi mwikale ne cijji, kayi anu Nzambi wa bwímpè ne luse to. Diloolo edi m'Musungidi webe; Dituku adi m'Mulumbulwishi webe.

²² Pa nanku ikala mutwishiibwe ne kwèna ushiya cintu kacyi cyenjiibwe to, mulunda wanyi. Ka—kacyakwikala . . . Kwèna ne ciwapeta to. Kwi—kwikadi wenza bwalu ku mpuukapuuka to. Ikala mutwishiibwe, mutwishiibwe anu menemene, bwalu kwèna ne mukwabo mpunga wa kubwelela to. Webe mpunga umwepele ke yèyè ewu, paucidi pa buloba apa.

²³ Vuluka muntu mubanji ne Lazaro, kuvwa lupondo lunene pankaci peebe ne Yèyè, ludi muntu nansha umwe kacya kayi mwanji kusambukaku to, anyi wadyakusambukaye to. Wamonu anyi? Paudi—paudi ufwa, bwalu bwàdikòsu. Ndi mumanye ne kutu bantu batu bamba ne badi bakusambidila bwa wèwè kupatuka mu myaba ayi, kadi kwitabuujiku aci to. Aci ncibengangane ne Dìyì dya Nzambi. Wamonu anyi? "Kudi mucu mweyemene aku, ke kwaponenawu." Ne Yesu wakamba, Yèyè mwine, ne: "Kuvwa lupondo, ne, pavwa muntu ufwa ne uya mu iferno, kavwa mwa kulwaku (kashidi) mu Dyulu to. Kacya muntu katu mulusambuke to, ne mene kî mmufwanyine kulusambukaku to." Abu mbwalu mbudikose, bwa ku dyanyi dimanya. Paakamba Yesu ne civwa ncyòci aci, ke cyònsò cidiku.

²⁴ Pa nanku vuluka anu ne, webe mpunga mmpindyewu, ne diloolo edi mbifwanyine kwenza ne ciikale webe mpunga wa ndekeelu.

25 Udiku mufwanyine kubakula cidi munkaci mwa kwenzeka anyi? Bu wêwè mwa kumonaku's we! Ndi mutwishiibwe ne kwêna wela meeji ku dyakula dya mushindu awu to, dya ne mêmè ndi nteeta kukwenzeja bwa wêwè kutangila muntu kampanda, anyi kwitabuuja muntu kampanda. Kî ncîndî munkaci mwa dyenza to, mulunda wanyi. Ndi nteeta bwa kukufikisha ku diitabuuja Yêyè mwena mu Bwikadi mutudi tusanganyiibwa mpindyewu awu. Yesu Kilisto, Nzambi mene wâkulumbulwisha mu Dituku adi awu, udi apa mwikale udifwanyikija Yêyè mwine mu bwikadi bwebe wêwè, cintu ciine cyakalayaYe ne Yêyè neënzè mu matuku a ndekeelu aa.

26 Ngela meeji ne Mwaneetu Price, mu dinda emu ku didya dya mu dinda, mmufile cifwanyikijilu cilenga cya dikema cya difika mu ditumba, pashiihe bikengela kwenza ditumba. Civwaku cinusankishe anyi? [Disangisha didi dyamba ne: "Amen."—Muf.] Ncinusankishe bushuwa. Civwa citeekiibwe bilenga, bilenga bya dikema.

27 Mpindyewu, nanku vulukaayi ne, misangu mikwabo mu ditumba, kadi tuvulukaayi tudi ne cya kwenza matumba aa. Ngâkayiisha pa cyôci aci, musangu kampanda, mucinyîke ne: *Masangu*. Tutu tufika mu disangu, misangu yâbûngi, bikengela tuye eku ne tunyunguluke kuye njila mishiileshiilangane.

28 Mpindyewu diloolo edi, bwa tusunsa tukese tudi tulonda etu, ndi muswe kwanga cyena bwalu cya—cya ne: *Dîyî Dyà Cimanyînu*. Nenu mpindyewu cyalu cyetu cidi cikangukila, diloolo edi, mu Mukanda wa Ekesode, ne mwaku *ekesode* udi uswa kwamba ne "kwikala munkaci mwa kupatuka; kupatudiibwa." Mpindyewu teetaayi bwa kuteeleja ne ntema yenu yônsò.

29 Ndi muswe ngaanuyiisha katanci, nudi bateeleji balenga be, kadi ncyênàku ne dîyî diine to. Didi anu dilubakaja dya meeji pa bwalu abu, kadi ndi mumanye cidibu bufwanyine kwikala. Bikengela ngikisheku ndambu bwa mpindyewu, bwa matuku matwe ku mwandamukulu anyi dikumi, kumpala kwa mêmè kubanga disangisha didi dilonda adi. Nudi numona's, kadyena anu disangisha dimwepele didi apa edi to. Didi disangisha, ku dituku ne ku dituku, ku lumingu ne ku lumingu, ku ngondo ne ku ngondo, ku cidimu ne ku cidimu, nudi numona's, kadi nudi anu mwa kudifwanyikijilaku peenu.

30 Kadi elaaayi meeji bwa misangu yônsò eyi, ku cidimu ne ku cidimu, kacya kakutu kwanji kwikala musangu nansha umwe ukaadiYe mwambe bwalu kabuyi bupwangane to, bulelela anu bwa menemene ebu; mu myakulu yônsò, munyunguluke buloba bujima, misangu mwandamutekete. Nwamonu anyi? Muntu nansha umwe, kaaba nansha kamwe, kêna mwa kwambaku ne kabivwa bipwangane, anu mu byôbî menemene, musangu wônsò. PadiYe wamba ne cintu kampanda necyenzeke, ncyenzeke anu

mushindu awu menemene. Ucyamba mbingu ne ngondo, ne bidimu, mene, kumpala kwa kwenzekaci, kadi ciikale cyenzeka cipwangane anu mu cyôci menemene. Kaciyi mwa kupangilaku kacya musangu nansha umwe to, ne kacyyakupangilaku to, bwalu n’Nzambi. Mpindyewu, mêmè ndi mwa kupangila, bu muntu. Kanwikadiku nuntangila mêmè bu cileejilu to, bwalu ndi—ndi anu bu nwênù menemene, anu ngènzàmpèkààtù wetu ewu musungila ku ngàsà. Kadi aci n’Nzambi, citambe-mfukilu, nwamonus, udifwanyikija Yêyè mwine. Kabyena bikengela anu bwa Yêyè kucyenza to, kadi Yêyè ngwâkalaya ne Yêyè neàcyènzè.

31 Yesu wakondopa bwalu civwa mbwa cyùjè Dîyì. Wakenza bintu abi bwalu bwa Dîyì dya Nzambi kuuladi.

32 Ke bwa cinyi Yêyè udi munkaci mwa kucyenza leelu ewu, bwa Dîyì dyùlè, dîngànùtèèledi adi, ku diloolo ne ku diloolo.

33 Mpindyewu monaayaaku dîbà adi pakaadi Bwikadi Bwende pabwîpì, Bwôbò abu, ncyà bushuwa ne, Budi bufila disaluka. Bu mûmvwà ngamba mu dinda emu ne: “Cintu kaciyi ne disaluka ncifwe.” Nenu ntendeleelu yônsò udi kayiku ne ndambu wa disaluka mu yêyè, mbipiciibwe ne bamujiike, mmufwe. Butu bulwa ne disaluka. Yêyè utu utufuululula. Kadi patudi bafuululudiibwe, tuvulukaayi Ciine cidi citufuululule aci. Cidi cyenze nanku ncinyi? M’Bwikadi bwa Nyuma Mwîmpè, Yesu Kilisto munkaci mwetu, uDileeya mudiYe ne mwoyi. Kaciyi mubidi wa musunya to; paalwa adi dîbà, paapingana mubidi wa musunya awu ufumina mu Dyulu, dîbà kadyakwikalaku kabidi to. Ke cyônsò aci. Ne tudi bamanye ne twètù, tudi ne mwoyi mu matuku a ndekeelu, mudibi bikengela bwa bintu ebi byenzeke.

Mpindyewu, Nzambi ukaadi mwenze bimwangi kumpala. Kudi . . .

34 Bintu byônsò bitu byenza lwendu anu mu isatu, kudi Nzambi. Nzambi mmupwangane mu isatu. Dilwa dya kumpala dya Kilisto, bwa *kupikula* Mukajende Musela; dilwa diibîdi dya Kilisto, bwa *kwangata* Mukajende Musela; dilwa diisâtù dya Kilisto, *pamwe ne* Mukajende Musela, bwa kukookesha mu Bukalenge bwa bidimu cinunu. Bintu byônsò bidi byenda anu mu isatu.

35 Mpindyewu, kukaadiku, nekwikale, bimwangi bisatu. Cimwe cya ku byôbi, Nzambi wakababweja *munda* mwa bwâtù, bwa cimwangi kampana, babanda kumutu kwa buloba. Musangu wakalonda, Nzambi kubapatula *pambelu* paa—paa Ejipitu, ne musangu udi ulonda, Nzambi udi ubambula *muulu*. Munda, pambelu, muulu! Cimwangi cidi cilondi ndibanda dya muulu. Ke cidi kumpala kwetu mpindyewu, cikondo cya dibanda dya muulu.

36 Bya mwomumwe anu mudi mwoyi wenza cintu cimwecimwe aci. Tudi tubwela *mu* mwoyi, tupatuka *pambelu* paa mwoyi,

tubanda *muulu* batangile ku mwoyi, anu cintu cimwecimwe aci menemene. Pa nanku tudi . . .

³⁷ Cyalu cyetu cidi ccikangukila diloolo edi ku cimwangi, nenku Nzambi uvwa pabwîpî ne kwangata ditunga dyende.

³⁸ Izaleela nditunga. Nzambi katu ukwata mudimu ne Izaleela bu muntu nkaaya to. Izaleela nditunga, mmwenzenze naabo mudimu misangu yônsò. Nenku mu matuku a ndekeelu, paanyima paa dyu—dyumuka dya Ekeleeziya, dibà adi Nzambi neasungile Izaleela bu ditunga. Didi mu buloba bwadi patudi twakulangana apa, badilongolole bwa cyôci aci. Nenku bôbò nebasungidiibwe, Bible mmwambe ne: “Ditunga nedilediibwe mu dituku dimwe.” Nzambi katu ukwata mudimu ne Izaleela bu muntu nkaaya to. Udi ukwata naabo mudimu bu ditunga, Izaleela, misangu yônsò, bwalu nditunga Dyende.

³⁹ Nenku ke Yêyè ewu pabwîpî ne kupatula ditunga Dyende pambelu paa ditunga kampanda, mu cimwangi, kuumusha bantu Bende ku dinyooka.

⁴⁰ Nenku anu mâyi miine akiinyija baa pa buloba ne kubabutula awu, akasungila Noa. Nwamonu anyi? Nenku anu Nyuma Mwîmpè mwine awu, udi bantu babenga leelu ewu awu, neangate Ekeleeziya ne neaMwambule muulu, ne neatwale manyooka pa aba badi kabayi baMwitabuuje. Ncyakamba Yesu.

⁴¹ PaakaMubiikilabo ne, “Beelezebula,” ngaakwilu mukwabo, Yêyè uvwa “mwena lubuku.” Bavwa . . .

⁴² Yêyè kwamba ne: “Nênnûfwè luse bwa aci,” Mwânà wa muntu. Mulambu kawuvwa mwanji kufila to. “Kadi paalwa Nyuma Mwîmpè bwa kwenza cintu cimwecimwe aci, diyè dimwe dibi bwa Yêyè awu kadyakufwidiibwaku luse to nî mu cikondo eci anyi mu cikondo cilwalwa.” Bikengela baMubenge, nenku paanyima paa cyôci aci ke paalwa dinyooka kudikuma. Nwamonu’s, lutatu ludi ne twêtù . . .

⁴³ Bidi bimvulwija bwalu bulonda bûngâakabalà musangu kampanda, bwa mwendeshi wa kale wa bwâtù uumukila ku mbû, nenku nso—nsongalume mufundi wa tusala mukwabo wa ba-Anglais uvwa wenda uya mutangile ku mbû. Nenku mufundi wa tusala ewu ukaavwa mufunde bintu bûngî cyanaana pa bidi bitangila mbû, kadi kacya kayiku mwanji kumumona to, pa nanku uvwa mu njila upweka mutangileku. Ke nkolomu wa pa mâyi awu kumwambilaye, ne cishiba cyende cya mfwanka ku mishiku cishaale ne katupa kaa cifwanka, yêyè ne: “Uyaaya penyi, mulumyana?”

⁴⁴ Yêyè ne: “Ndi mpweka mutangile ku mbû.” Yêyè ne: “Kacya ncitu mwanji kumumonaku to. Nkaadi mufundefunde pa bidi bimutangila, ne bikaadi bakwabo bambambe, kadi,” ke yêyè awu, “kaa, ndi ne disanka diyiila ne panshi bwa kumanya ne nkaadi museemene pabwîpî ne mbû.” Yêyè ne: “Kaa, kuumvwaku mupuuuya wa mâyi ende a mukele awu! Kumonaku

mudi nsongo ya mavwala ende matooke ibwayika kumutu kwende aku, ne mudi cyuluulu cya bleu cimwenekelamu, ne kuumvwaku myadi ya binyuunyi bya byôkosò padibi bibuuka kumutu kwende apu, kaa, ndi ne disanka diyiila ne panshi anu pa kwela mene meeji ne nyaaya kamumona's!"

⁴⁵ Nkolomu wa pa mâyi awu ne: "Mémè's ndi mulediibwepu, kukaadi bidimu makumi asambombo, nciyi ne cîndi mmona ciine cya cilenga kudiye." Nwamonu's, ukaavwa mumonemone byâbûngì mu mushindu wa bishaale ciibidilu kudiye.

⁴⁶ Mpindyewu ke lutatu ludi kudi ekeleeziya wa Mpenta leelu ewu. Ukaadi mumonemone byâbûngì bya kudi Nzambi, mu mushindu wa ne Nzambi ukaadi mushaale ciibidilu kudibo. Nwênù kanulekediku aci cinwenzekela to!

⁴⁷ Muneemu emu anu abidi adi panshi aa, mu Louisville, Kentucky emu. Mûndi mémè mufumine, Jeffersonville, Indiana, ndya muneemu dya musulu paudi ufuminamu. Inâbânzâ kampanda uvwa wendakana mu makajiinyi a bintu bya mushinga mukole. Nenu uvwa...ne kânâ kaa balume mu diboko, nenu uvwa uya ku meesa a cisumbishidi kadi mwikale wamba kutudika ne mwadi. Uvwa mwa kwambula cintu kampanda, ucileeja kânâ kaa balume aku; kânâ aku kavwa kasômbe kacya anu kaalengama. Uvwa mwa kuya ku makwabo meesa a cisumbishidi, wambula cintu ne ucileeja kânâ kaa balume aku; kavwa anu kacya kaalengama. Ke paanyima paa katanci, kwambulaye kangonga kakese e kubanga kukadidisha, kadi kânâ kaa balume aku nkacya anu kaalengama. Ke kubangaye kwela mbila mikole, wolola byanza. Kadi bantu bavwa mu makajiinyi amu bavwa anu kacya baamutangila, ke kuyabo kudiye bwa kumanya ne bwalu buvwa cinyi.

⁴⁸ Yêyè ne: "Ndi ne...Mwanaanyi wa balume mutekete ewu," yêyè ne, "ucidi anu ne bidimu bisatu cyanaana." Ke yêyè ne: "Ndi...Mbyenzeke dyakamwe ne, kukaadi cidimu cijima, mmubange anu ukaadi musômbe kacya walenga mutangile mu cibwashibwashi." Ke yêyè ne: "Ndi—ndi muye nende kudi ngangabuka," ne, "ngangabuka kufundaye manga kampanda ne bikwabo." Ke yêyè ne: "Ke ngangabuka mmungambile, leelu ewu, ne bwende yêyè udi anu bilenga. Kadi," yêyè ne, "kêna anu bîmpè to." Yêyè ne: "Ndi munyukushe mwine bintu byônsò kumpala kwende, bidi ne cya kukoka ntema ya mwânâ wa bukole bwende ebu, ntema. Byônsò bidi ne cya kukoka ntema ya mwânâ wa bukole bwende ebu, mémè kubinyukusha kumpala kwende, kadi yêyè mmushaale musômbe kacya walengama mutangile mu cibwashibwashi." Yêyè ne: "Kêna bîmpè to."

⁴⁹ Aci ncintu cifwanangane ne ekeleeziya wa Mpenta. Nzambi mmunyukushe dipâ dyônsò, mu Bible, kumpala kwabo, kadi bôbò mbasômbe kacya anu baalengamina mu cibwashibwashi, byenze bu ne civwa ncintu cibi. Dibâ dyâkanyi dya twètù

kutabuluka, balunda baanyi, kumpala kwa dîbà kwikaladi dimane kupita. Vulukaayi ne, Nzambi kèna unyukusha mapà awu padiYe kayi uteeta bwa kukoka ntema yenu to.

Nzambi uvwa munkaci mwa kupatula ditunga mu ditunga.

⁵⁰ Anu mudiYe munkaci mwa kwenza mpindyewu, neapatule Mukaji musela mu ekeleeziya, ushiya bakwabo baa ku dimiinu dya mukaji aba. Basungula nebapatudiibwe mu ekeleeziya. Ekeleeziya wa mu mubidi neashaale apa bwa kupicila mu dikenga dikole. *Musungula* awu udi mîngà misangu ubiikiidiibwa ne “musobola, musungula, udi mushaale.”

⁵¹ Tutangilaayi mwakenzaYe bwalu abu musangu awu, bwalu Yèyè katu ushintulula mushindu Wende wa dyenza bintu to. Nzambi udi ne mushindu umpwepele wa dyenza bintu, ne mushindu awu mene ke udiYe ubyenza, ne ke mushindu mujaalame ngwòwò awu, misangu yònsò. Monaayi mwàkacyènzàYe, ne mushindu wàkacyènzàYe mwòmò amu, ne pa dîbà adi tudi mwa kutapa dîsù dya pa bule ku eci nunku.

⁵² Mpindyewu, mêmè ntu mulongeshi wa ne bifwanyikijilu, cya bushuwa. Ncyèna ne kalaasa kândi mulonge to. Bikengela mêmè kutapa dîsù paanyima kumona cyakenzaYe. Ne twètù tutu bayiile ne: “Dipungila Dikulukulu divwa mundidimbi wa maalu adi ne cya kulwa.” Pa nanku mêmè mutangile apa nciyiku mumone cyanza cyanyi, kadi mumone mundidimbi wa cyanza cyanyi, ne mêmè mwikale ne minu itaanu, ndi mufwanyine kwikalaku ne cingenyingenyi cîmpè cya ne piikala cyanza cyanyi mwa kufika mwaba awu, mwwa ne minu itaanu. Pa nanku cyakabenzekela bôbò civwa bileejilu bya mudi Nzambi wenza maalu, mushindu udiYe ubyenza mpindyewu.

⁵³ Nunku mushindu udiYe ubyenza, katu Yèyè ushintuluka uumukaku to. Musangu wònsò, mu Bible, Katu ushintululaku mushindu Wende wa dyenza bintu to. Mmushindu umweumwe awu ku musangu ne ku musangu, bwalu mushindu Wende wa kumpala wa kucyenza mmushindu mupwangane. Bwalu, Yèyè kî mmufwanyineku kwikalaku ne mushindu mukwabo to, bwalu Yèyè mmupwangane, nenku, Yèyè, mishindu Yende yònsò mmipwangane. Tangilaayi numone mwàkacyènzàYe.

⁵⁴ Mòsà uvwa mubiikila ne mudyanjila kuteeka bwa yèyè kwangata mudimu uvwaye ewu, uvwaye—uvwaye mwangate ewu. Nzambi. . .

⁵⁵ Mpindyewu, ndi ngela meeji ne, bu nwênù mwa kufwaku luse bwalu ebu. . . Ncyèna ngamba bwalu ebu bu ne ncyèna mwele meeji to. Ndi ngamba anu ne, mu cyambilu emu, ncyèna—ncyèna mumanye cintu to ne ncyèna muswe kumanya cintu to pa kuumusha Nzambi. Mpindyewu, ndi ngela meeji ne ke mwaba awu udi bânà beetu beena Mvula Mishiishe papetele cibwejakaji, nwamonu’s, badi batentekelangana byanza ne bavwijangana baprofeta ne bikwabo. Mpindyewu, aci kî ncyà mu Mifundu

nansha. “Mapà ne mabiikila kî mbya dinyingalala to.” Wêwè udi mulediibwe cyùdi cyònsò aci. Udi, ku cibangidilu, cyùdi aci.

⁵⁶ Tangilaayi Bafaalesa abu mu matuku a kale àa. Bavwa anu ne ndambu mukesee wa bukênkè, bwalu bavwa mwa . . . bavwa ne mikenji, ne bavwa ne mwoyi ku mikenji ayi, kadi munda mwa mwoyi wabo muvwa mufiike anu fitutuu.

⁵⁷ Kadi kuvwa mukaji mukese, ndumba, wende mwonji wa kupim- . . . nsòmbelu ukaavwaye nende *apa* uvwa mufiike anu fitutuu, uvwa wa luumu lubi, kadi munda mwa mwoyi wende uvwa mudyanjila kulongolwela Mwoyi.

⁵⁸ Nenu paakalwa Yesu, Dîyì, kumata mu cyalu, Bafaalesa abu kwambabo ne: “Ewu Muntu m’Beezezebula.” Cyakenza cinyi? Cyakafiikisha ne kiine kaabukênkè kakese kavwabo naaku aku.

⁵⁹ Yesu kwamba ne: “Nudi baa tatwènù, dyabulu, ne midimu yende ke inudi nwenza eyi.”

⁶⁰ Kadi kakaji kaa nsòmbelu mukooyike aka, nkenze anu kafika, kamona anu Dîyì dya Nzambi anyi, kòkò kuDimanya. Kakavwa kadyenza mu nsòmbelu to, kadi kavwa kaDimanye. Nenu Dyòdi ndyenze anu dyakula naaku anyi, kwambaku ne: “Ndi njingulula ne Wêwè ewu udi Muprofeta.” Nenu Yèyè . . . Kòkò kwamba ne: “Ndi mumanye ne Maasiya ke wíkala mwa kwenza eci.”

Ke Yèyè kwamba ne: “Mêmè ke Yèyè awu.”

⁶¹ Cyakenza cinyi? Cyakatookesha mîdimà ne kuyivwija mitooke. Bwa cinyi? Kuvwa dimiinu diteeka mwaba awu, dimiinu didyanjila kulongolola divwa mu . . . Divwa meeji a Nzambi kumpala kwa difuka dya dyulu ne buloba.

⁶² Kudi mushindu anu umwepele wa Mwoyi wa Cyendelele. Pawikala ne Mwoyi wa Cyendelele, nanku wêwè mwine uvwa mu meeji a Nzambi kumpala kwa dyulu ne buloba kufukiibwabi. Udi cyambiibwa cya meeji Ende, bwalu cya Cyandelele kacituku cyanji kubanga ne kacadyakwikala ne ndekeelu to. Udi citupa cya cibucilu cya Nzambi, misangu yònsò. Cidi anu cidileeja mu cimfwanyi. Cidi cyenda cishaala nanku mpindyewu. Badi ne fòtò mukwabo wa kusukula, ndufu, pa dîbà adi ciibuloji cidi cishaala cintu ciine, pa dîbà adi udi mu Mukaji musela ne pamwe ne Kilisto, bu mwakeelaYe meeji. Bu mudi mulume ne mukajende, leelu ewu, pa nanku (Nzambi) Kilisto ne Ekeleeziya nebiikale cintu cimwe. Mpindyewu, musungula, mubiikila!

Môsà wakediibwa, “mwànà wa mulenga kumona.” Bible ngudi mwambe nanku awu.

⁶³ Umwe wa ku baprofeta, Yelemiya. Nzambi wakamba ne: “Pauvwa kuyi nanshà mwanji kudivunga munda mwa mamwêbè

apu, nkaavwa mudyanjile kukuteeka bu muprofeta wa bisamba bya bende.”

⁶⁴ Yone Mubatiiji, mona’s, uvwa mujaadikiibwe mu Mifundu. Yeshaayi, bidimu nkama mwandamutekete ne dikumi ne bibidi kumpala kwa dilwa dyende, wakamba ne: “Yèyè udi dìyì didi dyela lubila mu cipeela ne: ‘Longololaayi njila wa Mukalenge!’” Ne bidimu bitwe ku nkama inaayi kumpala kwa dimweneka dyende, tudi tupeta kabidi ne, Maalaki wakamba ne: “Monaayi ne Ndi ntuma musanjeela Wanyi kumpala Kwanyi, bwa kulongolola njila kumpala kwa Mukalenge.”

⁶⁵ Nwamonu’s, ukaavwa mudyanjila kuteeka. Ke muvwa midimu yònsò ya Nzambi ayi, piikalabo babiikila kudi Nzambi.

⁶⁶ Piikalabo bababwejemu ku dilonga dya tulaasa, aci cidì anu tuzoolo twa kumana naatu mikiiya, nwamonu’s, kacyena mwa kwikala cintu ciine to. Piikalaci ne nkwebe kùdì udiila, pa dîbà adi udi usumbisha bwanaabute bwebe ku cyakudya, neudye cibanga pa kuya ne bulongolodi anyi kasumbu kampanda. Kadi piikalaci cya kudi Nzambi, newimane ku luseke kwa Dìyì adi, nansha bya munyi, bwa wâkalediibwa bwa kwimana ku luseke lwaDi.

⁶⁷ Mòsà, muntu mukwabo nansha umwe kavwa mwa kwangata kaaba kende to. Muntu mukwabo nansha umwe kavwa mwa kwenza mudimu awu to. Yèyè ke uvwa muteekiibwe bwa kuwenza.

⁶⁸ Nenu, bânà beetu, mwaneetu wa bakaji, pawikala ne Mwoyi wa Cyendelele, uvwa muteekibwe bwa kwenza cintu kampanda. Pàmwāpa mukaji wa nzubu mulenga, pàmwāpa cintu kampanda cikwabo, kadi muntu nansha umwe kēna mwa kwangata kaaba keebe to. Nzambi mmukwenzele kaaba. Kukebi bwa kwangata kaaba kaa muntu mukwabo to. Aci ke ditentula dya mu musunya, wamonu’s, bileeja ne kudi cintu cipampalamuke mu wèwè. Ikala cyûdì aci, anu menemene. Kwikadi cîngà cintu nansha cimwe to.

⁶⁹ Mpindyewu, mpindyewu tudi tujandula ne Nzambi wakapa Mòsà bimanyinu bwa kujaadika madyambi ne mabiikila.

⁷⁰ Nenu cimanyinu cya bushuwa cyònsò, cimanyinu cya bushuwa cyònsò, cituma kudi Nzambi, cidì...citu ne dìyì paanyima paaci. Mpindyewu kanupangi kukwata nansha. Edi ndileesona dyanyi dya ndekeelu pa bwalu ebu, nwamonu’s. Cimanyinu cya bushuwa cyònsò...Mpindyewu tudi ne bimanyinu bidì kabiyi bya kudi Nzambi to; Sataana udi mwa kutentula ciibwîpi ne cintu cyònsò cidiku eci. Kadi cimanyinu cya bushuwa, cituma kudi Nzambi, cidì ne Dìyì dya Nzambi paanyima paaci.

⁷¹ Nzambi wakambila Mòsà ne: “Paabengabo kwitabuuja dìyì dya cimanyinu cya kumpala, pa dîbà adi wènzè cimanyinu cikwabo eci kumpala kwabo. Nenu pathiishe paabengabo

kuteeleja aci, angata anu mâyi uapongolole panshi.” Nenku aci civwa cimanyinu cya ne bavwa bashaala babole mwaba awu bolebole ne mashi abo bôbò biine.

⁷² Monaayi, nenku biikale anu bya mwomumwe paakambaYe ne: “Nutuutule lupwishi lwa ku makàsà enu. Nebitambe kutwadiibwa bwa Sodoma ne Gomola, dituku adi, kupita mwikalabi bwa cimenga cyanubenga aci.”

⁷³ Mpindyewu twêtù katwena tushimakaja bu bayaaya mu ekeleeziya nansha. *Eci* ke Ekeleeziya. Kilisto ke Ekeleeziya. Tudi munda mwa Kilisto. Mubidi musokome wa Kilisto, tudi balediibweMu. Kwêna mwa kudilamikaKu to.

⁷⁴ Ndi wa mu famiye wa beena Branham kukaadi bidimu bitwe ku makumi ataanu ne bitaanu, nenku kabatu banji kundombaku bwa mêmè kushaala mwena famiye awu to. Ntu mulediibwe mwikale Branham.

⁷⁵ Nenku mushindu awu ke ûdì mwena Kilisto. Udi mulediibwe mwikale mwena Kilisto, kuyi mudilamikemu to. Udi mulediibwemu. Bantu bônso badi baciina dilediibwa. Badi ne mushindu kampanda wa mwîmpè ne mukezuke wa kwangata dilabulangana dya ku cyanza, anyi wa kutwa cyâlâ pa karta kakese, anyi kakopo kaa mukele kiikale ne mâyi munda. Aci kî ndilediibwa to. Dilediibwa ncintu cya cikwacisha bwôwâ. Dilediibwa ncintu cibi—cibi kumona. Nansha ciikale mu cikumbi cya ngulube, anyi mu—anyi mu kaaba kaa nyama mu diyeeba, anyi mu cibambalu cya dileleshila cya lupitaadi cilengeja ne bilongo bya diikala dikunzubile; dileediibwa mbukooya, ne didi dikuvwija bukooya. Kwêna uswa kubilekela, kwêna uswa *cikampanda*, *cikansanga*, anyi *cikankenga* to, kadi binsonji ke byakukupula bilaabu kwîsù ne kukuvwija muntu mushiilangane. Wêwè mulediibwe cyakabidi, nebikuvwije bukooya, kadi neulwe cifukiibwa cipyacipyâ. Wamonu anyi? Bôbò kî mbaswe aci to. Mbaswe mushindu kampanda wa mupepele, nudi bamanye, kadi kwôkò kwine kakwena mishindu ya mipeepele to. Bu mudi musambu awu, mmwambe ne: “Nêndondè njila pamwe ne banyaabanya badyombola baa Mukalenge.” Kî mmuswe kwikala mucu mutenteka to.

Cimanyinu cya bushuwa cyônso cya Nzambi batu bacilonda kudi Dîyì dya Nzambi.

⁷⁶ Mpindyewu muntu yêyè mufile cimanyinu mu ditunga, anyi dîbà kana dyônso, ne piikala dîyì adi didiye wamba paanyima paa cyôci aci kadiyi Dîyì dya Nzambi to, dîbà nwaditangilaayi bîmpè, kanùdîtàbùùjì to. Piikala cilongelu kampanda cya kale, muntu yêyè mujuuke wamba, uleeja cimanyinu cya kudi Nzambi, kadi dilongesha dya muntu awu diikale dimanyina dimwedimwe dya Nzambi mu tulaasa dinutu naadi bidimu byônso ebi, Nzambi kî mmutumeku cimanyinu aci to. Alujaayi mèsù mu Mifundu numonebi ne bikaadiku byenzeke. Kenketaayi mu Mifundu.

Mulumyana walukila, wamba ne: “Mpindyewu tudi bônso baswe kwikala beena *cikampanda*. Ncintu cya kale cidì cijaadikiibwe.” Kanwitabuujì aci to. Netubwele mu cyôci aci, mu tusunsa tukese cyanaana, nudi numona’s. To, kanwitabuujì aci to.

⁷⁷ Nzambi utu misangu yônso ushindika bimanyinu Byende. Cimanyinu cya kudi Nzambi citu misangu yônso cijikula anu Dìyì dya Nzambi.

⁷⁸ Kadi cyôci ciikale cilongelu cimwecimwe cya kale cinuvwa naaci aci, Yêyè mmufwanyine kufila cimanyinu bwa cinyi, piikalabi ne nukaadimu? Yêyè udi uteeta bwa kunufikisha ku ditumba dyadya. Cimanyinu cya diimanyika! Tekesha lubilu! Tangila kûyaayà! Neûdyélè mu ditumba mwamwa paudi kuyi utangila bîmpè to. Kudi cibenda cya cimpicimpi, nenku kutu misangu yônso anu cimanyinu kumpala kwa wêwè kwela cibenda aci, bwa kukulama ku dyaenza dya njiwu. Benji bîmpè baa njila batu bafila bimanyinu. Kadi twêtù tudi mu lwendu mu njila batangile ku Butumbi. Nenku padi cimanyinu cyakula cyamba cintu cimwecimwe cya kale aci, kacivwa cya kudi Nzambi to.

⁷⁹ Nzambi utu ufila bimanyinu bwa kukoka ntema ya bantu Bende. Bimanyinu bitu mbwa kukoka ntema ya bantu baa Nzambi, ke bimanyinu bya Nzambi abi. Bimanyinu bya Nzambi bitu bifidiibwe bwa kukoka ntema ya bantu baa Nzambi.

⁸⁰ Mpindyewu apa cipuka cidì cilakuka kapyà aci civwa ncimanyinu bwa kukoka ntema ya muprofeta, citeeta, bwalu muprofeta uvwa munyeeme Nzambi, ke Nzambi kufila cipuka cidì cilakuka kapyà bu cimanyinu. Ke yêyè kumona cimanyinu cya cikemesha eci; ke yêyè kwamba ne: “Nêncingulukè bwa kumona ne eci cimanyinu cya cikemesha ncinyi, cyacya bu—bu cipuka cidì cilakuka kapyà kadi kacyi cibutuka.” Mpindyewu Nzambi nguvwa ukoka ntema ya muprofeta Wende uvwa munyeeme awu. Yêyè uvwa anu mwa kwikala mupete mukwabo, kadi Ukaavwa mumane kuteeka Mòsà bwa mudimu awu ne muntu mukwabo kaakwangata kaaba kende nansha.

⁸¹ Mu lwendu alu, bamwe bakwende baakateeta kuwenzà, nudi bamanye. Datana kuujuka mwikale ukeba kuwuvwija bulongolodi. Nzambi kwambila Mòsà ne: “Tapuluka. Mêmè nêmbâminè.” Nwamonu anyi?

⁸² Nzambi utu ukwata mudimu ne muntu nkaaya. Nwamonu anyi? Mpindyewu monaayi eci, Yêyè uvwa ukeba bwa kukoka ntema ya muprofeta, bwa kuteeka muprofeta pa kaaba kende kavwa kakengediibwa, nwamonu’s, ke Yêyè kufila cimanyinu cya cipuka cidì cilakuka kapyà.

⁸³ Nenku, monaayi, Dìyì dyakalonda cimanyinu divwa Dìyì dya mu Mifundu. “Ngûmvù mbila ya bantu Baanyi, ne mikemu yabo, bwalu bwa babenzeji baa midimu mikole abu, nenku ngâvùluku mulayi Wanyi.” Amen. Aci ncikose bwalu. “Ngâvùluku mulayi.”

Aci civwa n’Dîyi dya mu Mifundu. “Nenku Ndi nkutuma wêwè bwa upwekemu. Ndi mutuuluke bwa Mémè kubasungila, kadi Ndi nkutuma wêwè.”

⁸⁴ Vulukaayi ne, Nzambi katu wenza cintu nansha cimwe kakuyi muntu to. Nudi bamanye nanku anyi? Ke cyôci aci cididilendwisha bantu. Nwamonu anyi?

⁸⁵ Ke cyakabalendwisha pa bivwa bitangila Yesu. Kwambabo ne: “Wêwè udi Muntu, udyenza Nzambi.” Yêyè uvwa Nzambi, kadi bôbò kabavwa mwa kubyumvwa to. “Ee, Wêwè, mwikale anu Muntu wetu ewu.”

⁸⁶ Yêyè kwamba ne: “Ee, nwênù’s nutu nubiiikila baprofeta ne, ‘banzambi,’ ne mikenji yenu yitaba ciine aci. Nenku panwikala nubabiikila bôbò abu ne ‘mbanzambi,’ bôbò abu bavwa Dîyi dya Nzambi dilwa kudibo, mmunyi munudi mwa kumpiisha Mémè pândi ngamba ne Ndi Mwânà wa Nzambi?”

⁸⁷ Nwamonu’s, bimanyinu, bwa kukoka ntema. Nenku, vulukaayi ne, piikala ntema mikokiibwe kadi ciikale anu mushoonyi mwela umweumwe awu, kî n’Nzambi to.

⁸⁸ Kadi Nzambi udi mpindyewu munkaci mwa kukoka ntema ya muprofeta, ne Udi umupa cimanyinu, ne Dîyi dyakalonda cimanyinu aci divwa n’Dîyi dya mu Mifundu. “Ngâmônu cisamba. Ngûmvù mbila yabo. Ngävùluku mulayi Wanyi.”

⁸⁹ Mpindyewu Nzambi neakule ku Dîyi Dyende dilaya. Udi ne cya kutuma muprofeta Wende, bwalu Dîyi didi dilwa kudi muprofeta. Bible mmwambe, Nzambi ngudi mwambe, Yêyè mwine, ne: “Yêyè kêna wenza cintu nansha cimwe kayi Wanji kucibuulwila dyambedi basadidi Bende baprofeta nansha.” Nwamonu anyi? Nenku pa dîbà adi, cimanyinu ncifidiibwe, ne Mufundu mmujaadikiibwe, ke Dîyi dya cimanyinu ndyôdi adi.

⁹⁰ Nwamonu Dîyi dya cimanyinu, dya Môsà anyi? Dyambedi, cimanyinu civwa ncipuka civwa cilakuka kapyà; Dîyi divwa m’Mufundu.

⁹¹ Môsà kwangataye aci bu cimanyinu Cyende, ne wakapweka mu Ejipitu ne wakenza cimanyinu cyakamwambila Nzambi; ne cimanyinu civwa ne Dîyi diikaleku, ne bantu baakiitabuuja ne baakapatuka. Nenku pavwabo benda baya, bavwa benza bîmpè; kadi paakabangabo kunungana baakula bibi bwa Dîyi, pa dîbà adi baakiimana.

⁹² Vulukaayi ne, Izaleela uvwa mu lwendu. Nuvwa bamanye bule bwa njila wâkenzabò? Nunku bavwa... Bavwa anu mu ntanta wa miles makumi anaayi [kilomeeta 64] cyanaana, kadi bayenza munda mwa bidimu makumi anaayi. Bwa cinyi? Mbwalu baakabanga kunungana baakula bibi bwa Dîyi divwa ditwale cimanyinu. Mushindu mwine uvwabo kabayi batambe kumanya, pavwabo beela mbila lwa kwînshi kwaka ku mwelelu wa mâyi apu, baja mu Nyuma, ne Môsà wimba mu Nyuma,

ne bavwa anu mu ntanta wa matuku makese menemene. Kadi kubangabo kunungana, bajinga kwenza cintu kampanda cya cishiilangane; ke kushaalabo bidimu makumi anaayi mu cipeela, kumufwilabò bwa bwalu abu, ncyà bushuwa, bwalu kabaakiitabuuja to. Nzambi wakamba ne: “Udibo banungeena kî ngwêwè to, Mòsà. Udibo bamba bibi m’Mêmè.” Cívwa n’Dìyì dya Nzambi, kacívwa Mòsà to.

⁹³ Mpindyewu tangilaayi, Yehowah neakule ku Dìyì Dyende dilaya, pa nanku Udi ne cya kutuma baprofeta Bende. Aci, panudi baswe kumona aci, mmu Genese 15.16. Tudi tujandula ne Nzambi wakambila Abraham ne: “Dimiinu dyebe nediikale dnyeni mu buloba bwenyi ebu, ne Mêmè nêmbàpâtùlè ne diboko dya bukole. Bubi bwa beena Amola kî mbwanji kuula to.” Milayi Yende yònsò yakafilaYe ayi, ke Yêyè ewu ukoka muprofeta, ku cipuka cidì cilakuka kapyà.

⁹⁴ Mpindyewu bu cipuka cidì cilakuka kapyà aci mwa kwikala cyambe ne: “Mòsà, Nzambi udi Nzambi.”

“Eyo, ndi ngitabuuja nanku.”

⁹⁵ “Kaa, udi wenza bìmpè, Mòsà, tungunuka anu naaci nanku. Udi musele mukaji mwîmpè; mmwânà mulenga kwîsù. Ncyà bushuwa ne udi ne mwânà wa balume mwîmpè! Butumbi kudi Nzambi!” Aci’s ncilongelu cimwecimwe cya kale aci. Nwamonu anyi?

⁹⁶ Kadi Yêyè uvwa pabwîpì ne kwenza cintu kampanda, pa nanku bivwa bikengela Yêyè kukoka muntu awu. Ke Yêyè kupa muntu awu bimanyinu bibidi bya kwenzaye, wamba ne: “Cimanyinu cyònsò cívwa ne Dìyì.” Ke cidì cijaadika ne mmwômò. Mpindyewu tangilaayi cyakamba Mèyi awu, nansha mene difuka. Yehowah uvwa pabwîpì ne kwakula mpindyewu.

⁹⁷ Kabidi, dilwa dya muprofeta ditu ncimanyinu. Nukaadi bamanye nanku anyi? Dilwa dya muprofeta, bwa cikondo, ditu ncimanyinu.

⁹⁸ Mpindyewu ncyêna nswa kwamba dya Docteur mu Bunzambi nansha. Ncyêna nswa kwamba dya mpaasata kampanda udi uneemeka bidiye wamba, dya muntu mwîmpè kampanda to. Abu badi anu bìmpè. Abu mbasadidi baa Nzambi.

⁹⁹ Kadi muprofeta utu ncimanyinu. Ncidi Bible wamba mwaba ewu. Kadi ncimanyinu cya cinyi? Ncimanyinu cya ne Dìyì Dyende dikaadi pabwîpì ne kuula, kuujiibwa ku Dìyì dya cimanyinu cya yêyè muprofeta ewu.

¹⁰⁰ Monaayi, dilwa dya muprofeta ditu ncimanyinu cya didimwija bwa dilumbulwisha didi pabwîpì. Nukaadi bamanye nanku anyi? Dilumbulwisha didi pabwîpì ne kudikuma kwòkò kwikale muprofeta pa buloba.

¹⁰¹ Vulukaayi ne, ncyà bushuwa ne, dyambedi, bikengela yêyè ànjì kushindikiibwa kudi Nzambi ne Dìyì bwa dituku adi,

ke kushiishaye kwenza cimanyinu. Nenuku nutangilaayi ciine cimanyinu aci, cidiye uduyanjila kwamba ciine. Wakamba ne: “Bwalu abu bwenzeke, nanku numuteelejaayi.” Nomba 12.6. “Bwôbô kabuyi bwenzeke to, bupwaayi mwoyi.” Bidi bikengela ciikale cimanyinu cya mu Mifundu cidiYe ufila.

¹⁰² Nenuku cyakafilaYe bu cimanyinu, musangu kampanda, piikalaYe umweumwe awu makeelela, leelu, too ne kashidi, Udi ucifila mushindu umwecimwe awu ku musangu ne ku musangu. “Diyi dya Mukalenge divwa dilwa kudi baprofeta.” Bôbô bavwa Dîyi. Ne paakalwa Yesu, Uvwa Dîyi. Ne Dîyi divwa dijingulula meeji ne mapangadika a mu mwoyi, ku musangu ne ku musangu, anu nanku anu nanku. Mpindyewu tangilaayi.

¹⁰³ Dilwa dya muprofeta ewu, udi ufila cimanyinu, cya ne, “dilumbulwisha didi pabwîpi,” misangu yônsò.

¹⁰⁴ Twănji twimanaayi bwa tusunsa tukese cyanaana. Ncyakwangata dîbà dipitepite bûngi to. Twănji tukenketaayi babidi cyanaana mpindyewu, mu tusunsa tutwe ku dikumi. Ne citupa cya mukenji, cidi cishaale’s we, mu tusunsa dikumi.

¹⁰⁵ Noa, muprofeta pa buloba—pa buloba, cimanyinu cya dilumbulwisha divwa dilwa. Môsà, muprofeta pa buloba, cimanyinu cya dilumbulwisha divwa dilwa. Eliya, muprofeta pa buloba, cimanyinu cya dilumbulwisha divwa dilwa. Yone, muprofeta pa buloba, cimanyinu cya dilumbulwisha divwa dilwila Izaleela; kakuyi mpatà to bavwa anu babapangisha.

¹⁰⁶ Monaayi, cimanyinu! Cimanyinu cidi cyenza cinyi? Cimanyinu mbwa kukoka ntema, ne kufikisha basungula ku diikala badilongolole, ne kuumuka mu njila kumpala kwa dilumbulwisha kudikumadi. Ke cyakenza Noa, wakalongolola basungula. Bakwabo baabo, nenuku cidi cyenza cinyi? Cimanyinu, ne Dîyi dya cimanyinu, didi dipiisha mwena bupidya ne dimulongolola ku dilumblwisha. Didi dilongolola musungula ku dipanduka. Ke cidi cimanyinu. Ke bwa cinyi bimanyinu bidi bifidiibwa, bwa dilumbulwisha dilwalwa. Bwa basungula bôbô, badi bacimona.

¹⁰⁷ Bu kakaji kaa mwoyi mukezuke aku, ne mubidi mukooyike; ne Mufaalesa mwikale ne mubidi mukezuke, kadi ne mwoyi mukooyike. Cyakapiisha umwe, kadi kusungila mukwabo.

¹⁰⁸ Nenuku dilumbulwisha diine dyakasungila Môsà adi, dyôdi adi ndyakapiisha baa pa buloba; diyishi dyende.

¹⁰⁹ Cidi cilongolola basungula. Basungula mbalongolola ku cinyi? Padibo bamona cimanyinu cifila kudi Nzambi, badi bapingaja mêsu paanyima mu Mifundu nenuku bamona ne cyôci aci cidi ne cya kwikalaku anyi. “Eyo, ncyôci eci.” Ncinyi ciine aci? Dilumbulwisha dilembelele. Pa dîbà adi basungula badi bateeleja Dîyi.

110 Kadi badi kabayi basungula mbapange, bamba ne: “Bintu bya cyanaana. Tungunukaayi! Twètù netwangate anu cilongelu cyetu cya kale aci.” Nwamonu anyi? Ke mushindu wakenzabo mu matuku a Luther. Ke mushindu wakenzabo mu matuku a Wesley. Ke mushindu udibo—udibo benza mpindyewu, utubo benzena misangu yònsò.

111 Kadi ncimanyinu, ne cidi ne Dìyì didi dilonda cimanyinu. Ne Dìyì adi ndijaadikiibwe bu Dìyì dya mu Mifundu. Mpindyewu kanupu aci mwoyi to. Mpindyewu nulamaayi aci ciikale anu cibwela, bwalu bidi mwa kwenzeka ne nciciyi mwa kunumona kabidi to.

112 Ndi njinga bwa ngâpetakù mushindu wa mêmè kupweka muneemu emu mwaba kampanda ne kwangata bânà beetu bônso, dîbâ diikalabo kabayi ne matabuluja miikale enzeka to, kwasa ntenta kadi kusòmba anu naka, ku dituku ku dituku, kadi kucilongesha too—too ne padici cibwela cibwelekamu. Kadi Yèyè kí mmufwanyine kucyanyisha to, mûndi ngela meeji. Nudi numona’s, tukaadi pabwîpi menemene ne nshiikidilu. Ndi ngela meeji ne tudi mpindyewu anu kunshiikidilu mene.

113 Mu mukanda wanyi muntu mwamwa, mûndi mulame maalu mafundamu. Mu 1933, mu dinda kampanda, mwikale ndilongolola bwa kuya mu kalaasa ka Dyalumingu, kalaasa kaa Dyalumingu ka ba-Baptistes mûmvwâ mpaasata, Nyuma Mwîmpè kulwa kundeeja maalu too ne ku cikondo cya kunshiikidilu, kundeeja bintu mwandamutekete bivwa mwa kwenzeka. Mêmè kubifunda. Bidi pa dibeji dya kale dya kalaabi.

114 Yèyè kungambila anu menemene muvwa Allemagne mwa kwibaka lumbu lwa Siegfried Line alu, ne muvwa beena Amerike mwa kutuucikaku bikole, bidimu dikumi ne cimwe kumpala kwa—kwa lumbu alu kwibakiibwalu.

115 Kwamba muvwa Mussolini mwa kujuuka, ne muvwaye mwa kuya mu Éthiopie, ne muvwa Éthiopie mwa “kuponu ku makàsà ende.” Ne muvwaye mwa kufwa lufu lwa bundu, mwele katungu, ne bantu bende biine bamutwila mata.

116 Mêmè kwamba ne: “Kudi tusumbu tusatu: Communisme, Fascisme, ne Nazisme. Twònsò atu netukadisange mu Russie, mu Communisme.” Ne yèyè ewu ke wíkala Kat- . . . wabutula cyena Katolike. Numonaayi ne kèna ucyenza!

117 Mêmè ne: “Ditanta dya mushindu ewu nedyenzeke!” Mêmè kwamba ne: “Ndi mmona mashinyi mafwanangane ne diyi, enda apweka mu mùsèèsù. Kudi tushinyi tupweka mu bibeeba, twikalè ne bukontononyi bwa mushindu kampanda, katuyi takeba bwa batwendesha ne yèndà to. Ndi mumone famiye kampanda wa beena Amerike munkaci mwa kunaya checker lwa paanyima paa kashinyi aku.” Bakaadi ne kashinyi aku patudi twakulangana apa, piikalabo mene ne bibeeba bya kukateekamu’s. Kashinyi kakese kaa VW aka’s ndiyi mu

bupwangane bwadi, anu menemene, ne ke mudiku ku tushinyi tukwabo twônsò etu. Nudiku mwa kudifwanyikijila, mu 1933, mmwenekelu uvwa nende tushinyi, ne wa twa mpindyewu etu?

¹¹⁸ Nenku pashiishe Cyôcì kudyanjila kwamba kabidi, ne, dyanyishila dya bakaji bwa kwenzabo masungulangana, ne civwabo mwa kwenza. Ne muvwa ditunga edi, diikale cifwanyikijilu, difwanangane ne Izaleela, difike mu buloba kampanda kadi kwipata beena kalaba, kadi kupyana buloba abu. Ne bamfumu bakese ba ku mbangilu baakapetabo, Davidi ne Solomo, bavwa bamfumu bavwa baciina Nzambi. Paanyima paa cikondo kampanda, kupetabo Aakaba mu cyalu. Bôbò kumwelela tukanda kumusungula. Nkwasa neikale ne... ekeleeziya kushaalaye ne ngiikadilu wa maaluu a pa buloba. Nenku, twêtù kupeta Lincoln ne Washington, monaayi cidi ditunga leelu. Monaayi kutukaadi twenda tuya mpindyewu. Cintu cidi cilonda ncinyi? Tudi ku cikondo cya kunshiikidilu.

¹¹⁹ Nenku ncimanyinu, mu bufuki emu, anu menemene. Cidi cifikisha basungula ku didilongolola; ne cidi cipiisha, ku dilumbulwisha, mwena bupidya.

¹²⁰ “Piikala muprofeta ewu mwikale muprofeta mulelela, ne cidiye wamba ciikale cyenzeka,” Bible mmwambe, mu Nomba 12.6 ne, “nuteeleje didimwija dyende, bwalu mbijaadikiibwe ne kî mmuntu awu to.” Mu—muprofeta mmuntu. Kadi Dîyì dya ku cimanyinu citambe mfukilu n’Dîyì dya mu Mifundu, ndijaadikiibwe, nanku ndidimwija.

¹²¹ Bible wakafundiibwa kudi baprofeta, nwavulukaayi. Mu Peetelo Mwibidì, kabidi, 1.21. Kabidi, mu Ebelu 1.1.

¹²² Dikunji dya Kapyà, bwa Mòsà, divwa ncimanyinu, Dîyì divwa dilwa kwakula. Dikunji dya Kapyà divwa dileeja ne Dîyì divwa dilwa kwakula. Ke cimanyinu aci, Dikunji dya Kapyà. Nwênù bivwa bikengela nwavuluka bwalu bwa ku Houston abu, kî nkwanji kwenza ntanta to.

¹²³ Mòsà, muprofeta, cimanyinu kudi Izaleela, cya ne mulayi ukaavwa pawîpî menemene ne kuula. Paakapweka Mòsà ne kwenzaye cimanyinu cya muprofeta, ke kumanyabo anu mwaba awu ne yéyè uvwa mwa kudasanga kaaba kamwe.

¹²⁴ Mushindu mwine udi Dîyì dya Nzambi dipwangane mu bulongame, musangu wônsò anu dimwedimwe adi. Nansha mene mûndì mwambe makeelela diloolo, mushindu uvwa Ulima Tuumima, ne bikwabo byônsò, byandamuna misangu yônsò kudi Nzambi.

¹²⁵ Twangataayi kabidi muprofeta kampanda, katanci kakese cyanaana, Yona. Mvwa mufunde nshapita 1 wa Yona mwaba ewu, nshapita 1 mwaba ewu wa ciprofeta cyende. Yona wakapatuka mu difu dya mushipa wa balena, civwa ncimanyinu. Nwamonu’s, bantu abu bavwa bampanganu. Bavwa bakuukwila

nzambi ya mu mbû, ne nzambi wabo wa mu mbû awu uvwa mmushipa wa balena awu.

126 Mpinyewu bantu bââbûngi batu bakeba kupiisha Yona. Ntu mêmè misangu yônso ntwâ anu ku cya Yona. Yona kavwa mupatuke mu diswa dya Mukalenge to. “Makàsà a baakane atu malombola kudi Mukalenge.” Tutu tujinga kwamba ne: “Ewu n’Yona.” Kadi twânjì twangataayi bwalu ebû ku wabu. . . mushinga udibu naawu, musangu umwepele. Ndi mumanye ne yêyè uvwa ne cya kuya ku Niniwa, kadi Nzambi kumufikisha ku dyangata bwâtù bwa ku Taashishi abu. Nenku ke kwenzaYe bwa ne lutatu lulwe pa mbû.

127 Yona kwambaye ne: “Nswikaayi byanza ne makàsà. Mêmè ke udi mu lutatu, udi mulukebe.” Ke kumwelabo pambelu. Ke mushipa paawu wenda wowela mu mâyi, mushipa munene uvwa mumine Yona awu. Ndi mumanye ne mbikole bwa beena maalu a mamanya kwitabuujabo.

128 Mwaba ewu anu abidi adi panshi aa, mu Louisville, Kentucky, kukaadi bidimu bitwe ku dikumi, bavwa bateeke mushipa wa—wa balena bawulaadike pa—pa dikaadika dya ciibwashi. Nenku kuvwa kaalumangu kakwabo kaa ci-Ricky mwaba awu, kiikale ne luumvu lutambe dimanya dyaku dya bukontononyi. Kavwa kajinga kuleeja ne Bible mmwambe cya mafi. Yêyè ne: “Nudi bamanye, nutu anu nuumvwa lusumwinu lwa kale lwa mu Bible alu, lwa ne mushipa wa balena wakamina Yona.” Yêyè ne: “Monaayi, kwêna mwa kupicisha ndundu pa muminu wawu apu to, uvwa mukese be. Mmunyi muvwa muntu mukole wetu ewu mufwanyine kubwela mu difu dyawu?” Yêyè ne: “Nudi numona’s, cidi anu ndusumwinu lwa kale, bu mudibi ne Bible mmûle tente ne nsumwinu ayi.”

129 Aci civwa cimpicile bwa wanyi—wanyi ngeelelu wa meeji. Mêmè kwamba ne: “Mukalenge, ndi njingaku kwamba kantu mwaba awu.”

Yêyè ne: “Cyûdì peebe naaci cya kwamba ke cinyi?”

130 Mêmè ne: “Udi umona, kwêna mubale Bible bîmpè to.” Mêmè ne: “Bible mmwambe ne ewu uvwa mmushipa wa balena wa pabwawu. ‘Nzambi wakalongolola mushipa munene.’ Ewu uvwa mwibaka mu mushindu wa pabwawu, bwa kumuminawu, wakamulekela ucyenza! Kawuvwa mushipa wetu wa patupu ewu to. Nzambi uvwa uringa kwenza mudimu wa kawuyi wa ciibidilu to, ke pa nanku Yêyè kwangata mushipa uvwa kawuyi wa ciibidilu to.” Nwamonu anyi? Kushaalaye matama bu byâtâ pa bwalu abu. Nenku, aci, Nzambi uvwa ne cintu cya pabwaci.

131 Bu kânâ kaa bakaji kakwabo, musangu kampanda, kuumukila ku tabernacle; tusuki twende twela cisaku tutuma paanyima, tufinunuja bilenga, bikumbane mu mushindu wa ne mpala wende umweka anu bu ditungulu dyuvula. Uvwa ufuma ku dipeta Bible, wenda upweka.

132 Mukulumpe ewu dyende Jim Dorsey uvwa musòmbèle mu Utica. Uvwa mwena bupidya, musalaayi wa kale, kadi—kadi kayi witabuuja Nzambi to. Ke yêyè ne: “Uyaaya kwèpì, wèwè mwâbânà?”

Yêyè ne: “Nyaaya mwetu, mukalenge.”

Yêyè ne: “Aci cyûdì mwambule mu dyâpà ncinyi?”

Yêyè ne: “M’Bible.”

Yêyè ne: “Kutu witabuuja abi to, s’mmwômò?” Ke yêyè. . .

Yêyè ne: “Kaa, s’ndi mbiitabuuja, mukalenge.”

133 Yêyè ne: “Utu witabuuja bwalu budibo balondamu bwa ne mushipa wa balena wakamina Yona abu?”

Yêyè ne: “Mona’s, cya bushuwa, ndi ngitabuuja Dìyì dyònsò didimu.”

134 Yêyè ne: “Neujaadikeku bwalu abu munyi mu mûngà mushindu paa kuumusha ku diitabuuja, cinudi nubiiikila ne ndiitabuuja aci?”

“Mona’s,” yêyè ne, “pângààyà mu Dyulu, nênkongkè Yona.” Nwamonu anyi?

Yêyè ne: “Kadi yêyè kayimu dîbà adi?”

135 Yêyè ne: “Pa dîbà adi nebikengele umukonke wèwè.” Neku ngela meeji ne ke mumwolodi mwîmpè menemene nyêyè awu. Neku ngela meeji ne aci ncyenzeku bu cya bushuwa.

136 Piikala Bible mwambe ne Yone wakamina mushipa wa balena, mêmè ndi mufwanyine kuciitabuuja. Yêyè uvwa mufwanyine kucilongolola. Cidi Nzambi mwambe, Nzambi udi ne bukole bwa kucyenza, ne Yêyè utu anu misangu yònsò ushaala mukwate ku Dìyì Dyende. Pa nanku, Yona, tutu tumuseka. . .

137 Kadi nukaadiku bamone mushipa padiwu wowela anyi? Utu wenda ukebangana ne cyakudya. Neku padiwu udyà, udi upweka too ne panshi paa mâyi ukiikishisha tupèpà twawu panshi paa mâyi apu. Diisha mishipa yebe ya màbundu ayi kadi umone cidi cyenzeka. Yidi yuja anu mafu awu, pashiishe yipweka too ne panshi paa mâyi kadi kuteeka bièpà byayi abi panshi, yishaala milaale mitwe mafu panshi mituuje.

138 Ee, mushipa munene mulongolola ewu wakalwa kadi kumina muprofeta ewu. Ke kupwekawu too ne panshi paa mâyi a mbû, pâmwâpa mu ndondo wa fathoms makumi anaayi [mètres 72] mwinshi amu. Wakapweka mwinshi mule, bwa kwikishawu panshi paa mâyi a mbû.

139 Mpindyewu twètù bònsò tutu twelangana meeji bwa Yona. Neku muntu yònsò utu wambaku ne: “Mpindyewu bavwa bansambidile, kadi cyanza cyanyi kaciyena anu cishintuluke menemene to. Bavwa bansambidile, kadi ncyèna ntamba anu kudyumvwa bîmpè to.” Kanwikadiku nwela Yona cibingu to.

¹⁴⁰ Mpindyewu tangilaayi bileeeji bya disama bivwaye yêyè naabi. Mpindyewu, cyakumpala, uvwa usanganyibwa munkaci mwa mbû mutuuta kudi cipeepele cikole, ke kupambukaye mu njila mwine uvwa Nzambi mumutume. Byanza byende ne makàsà bivwa biswika. Bavwa bammwele mu mbû mutuuta kudi cipeepele cikole, mbû mutomboke, ke mushipa wa balena e kumuminawu kadi kupweka nende too ne panshi paa mâyi a mbû. Nenku uvwa mulaale muntwamu mu bilushi bya munda abi, mu difu dya mushipa wa balena amu, bisoosa bya mu mbû bimujingile mu nshingu. Nenku bu yêyè mwa kutuma mèsù *elu* luseke, civwa anu difu dya mushipa. Utuma mèsù *lwalwa* luseke, civwa anu difu dya mushipa. Kwônso kuvwaye mwa kutuma mèsù, civwa anu difu dya mushipa. Nwênù badi baakula nwamba bwa bileeeji bya disaama's, yêyè's ke uvwa mwa kwikala mubipete. Kadi nudi bamanye cyakambaye? Wakamba ne: "Mbintu bya cyanaana bya mafi. Mêmè ncyakubitangilaku kabidi to, kadi nêntangijè cyakabidi mèsù aanyi ku ntempelu Webe wa cijila."

¹⁴¹ Bwalu Solomo, muntu wetu wa mubidi wa pa buloba ewu, wâkasambila dîbà dya dibanjija dya ntempelu, wakamba ne: "Mukalenge, bantu Beebe bôbò basanganyibwa mu lutatu nansha bamba ne mpenyi, bôbò batangije anu mèsù abo ku mwaba wa cijila ewu, dîbà adi wateelejaku mu Dyulu amu."

¹⁴² Nenku Yona uvwa ne diitabuuja mu bivwa Solomo mwambe mu disambila. Ke Nzambi kumusungila kudi mushipa wa balena awu, paanyima paa matuku asatu a muunya ne a bufuku. Nunku Yêyè's uvwa mwa kwikala muteeke ntenta wa mbombone lwa mwinsi amu. Ncyèna mumanye cyakenzaYe to, kadi Wakamulama ne mwoyi munda mwa matuku asatu a muunya ne a bufuku, bilondeshile Dîyi. Ne Dîyi ndya cya bushuwa.

¹⁴³ Ee, piikalabi ne Yona, mwikale mu maalu a mushindu awu, uvwa mwa kutangija cyakabidi mèsù ende ku ntempelu uvwa muntu mwenze, nebitambe kwikala munyi bwebe wêwè ne mêmè, diloolo edi, bwa kutangija mèsù etu ku Ntempelu udi Yesu mwimane ku dyabalume dya Mutambe bunene, ne Mashi Ende Yêyè mwine, utwawkwila mwimanyine pa dijikula dyetu, pa tuuleeeji twetu tukese twa masaama! Kwikadi upiisha Yona to, kadi pashiishe kutangija mèsù ku bidi bikutacisha. Tangija mèsù ebe ku mulayi ne: "Nzambi ngudi mwambe nanku!" Panwikala bânà baa Abraham: "Nzambi ngudi mwambe nanku!" Yêyè ngudi mwenze mulayi, nenku aci ncikose bwalu.

¹⁴⁴ Monaayi, bantu bônso bavwa bapatuke baye ku diloba, biikale bakoka makondo abu ne bikwabo. Paanyima paa muntanci, ke nzambi wa mâyi a mbû udi ubanda ewu, mushipa wa balena, muvukute lubilu mutangile ku mwelelu wa mâyi. Bantu bônso kupona panshi e kutwa binù. Nzambi mmumanye mwa kwenza maalu. Nenku kuyaye too ne ku mwelelu wa mâyi

kadi kupatula ludimi e kubanga kudilaka, nenku, dya anu wenza nanku anyi, ke muprofeta udi upatuka mukana mwa mushipa wa balena ewu. Muprofeta! Ke nzambi awu kulùka muprofeta ku mwelelu wa màyi aku. Kabyena bwalu bwa bukemesha to paakanyingalalabo. Nwamonu anyi?

¹⁴⁵ Civwa ncimanyinu. Yona mulùka kudi mushipa wa balena, civwa ncimanyinu. Wakenza cinyi? Aci civwa ncimanyinu cya kudi Nzambi. Dîyì dyakamba cinyi? “Nyingalalaayi anyi nudi nubutuka, mu matuku makumi anaayi.” Cimanyinu cya Nzambi; Dîyì dya Nzambi! Misangu yònsò, padi Nzambi utuma cimanyinu, Nzambi udi utuma Dîyì Dyende dilonda cimanyinu aci. Monaayi: “Nyingalalaayi, anyi mu matuku makumi anaayi cimenga eci cijima necibutuke.”

¹⁴⁶ Yone muprofeta udi umweneka pa buloba, paanyima paa bidimu nkama inaayi kabayi ne muprofeta to; cimanyinu paanyima paa bidimu nkama inaayi, cya yêyè umweneka. Cikondo cikese cya dilenguluka aci!

¹⁴⁷ Mpindyewu nwênù biikale baa nyuma nenubakule cîndi ngamba eci. Nzambi unzululeku cyumvwilu cyenu. Kukaadi kupite ntanta bule kaayi!

¹⁴⁸ Bidimu nkama inaayi, Izaleela kayi ne muprofeta to, ekeleeziya ikaavwa midijingakaje, nenku pashiishe ke Yone udi umata mu cyalu ewu. Yone uvwa muprofeta, cimanyinu cya ne Maasiya uvwa ulwa kwakula paanyima pende yêyè. Tangilaayi. Bwalu, Maalaki 3 uvwa mwambe ne: “Nêntumè musanjeela Wanyi kumpala Kwanyi, bwa kulongolola njila, kulongolola bantu.”

¹⁴⁹ Tangilaayi Yone, kakuyi citù nansha cikese mu yêyè to. Yêyè kaakadyangacilaku butumbi to. Baakateeta kumubiikila ne m’Maasiya; kadi yêyè wakamba ne: “Mêmè ncyèna mukumbanyine kusuulula nshinga ya ku bisabaata Byende to.”

¹⁵⁰ Kadi Yesu mmwenze anu umweneka, Yêyè uvwa ne cimanyinu, Dikunji dya Kapya, Bukênkè kumutu Kwende, mu mmwenekelu wa nyuunyi wa nkuci upweka ne Dîyì dyamba ne: “Ewu ke Mwanaanyi munanga, Úndi nsankila bîmpè.”

¹⁵¹ Monaayi, ke Yone dyakamwe kwamba ne: “Yêyè udi ne cya kubanda. Mêmè ndi ne cya kupweka.” Wakaleeja Ekeleeziya kudi Kilisto. Amen.

¹⁵² Tutu bayiile ne, mu matuku a ndekeelu, aci necyenzeke cyakabidi! Nekupatuke Mukenji, wikala mwa kuleeja Maasiya kudi bantu. Nenku neciikale mu mushindu wa ne, nebashaale matama bu byâtà anu mwakashaalabo musangu awu. Yêyè ngudi mucilaye. Nshapita wa Maataayi udi ulonda, wa Maalaki, ke udi utwambila bwalu abu. Tangilaayi.

153 Baakeela lukonko pa bwalu abu. Ngiikadilu wa Yone uvwa umufwanyikija ne nyuma wa Eliya. Mpindyewu tangilaayi baprofeta babidi aba.

154 Mpindyewu, Eliya uvwa mmuntu wâkajuuka mu cikondo cya Izaleela, mu cimvundu cinene.

155 Aakaba nguvwa mfumu. Ne bakaji bônso bakaavwa batentule Izabela, ne pâmwâpa ne nsuki mikosa bisuba ne bikwabo byônso, pâmwâpa anu bu mutudi naabi leelu ewu emu. Nenku bônso bakaavwa balonde anu Izabela. Ne bampaasata bavwa beela meeji ne: bivwa anu bîmpè. “Balekelaayi. Balekelaayi bàbyènzè.”

156 Nenku mu cikondo aci, Nzambi wakajuula muntu uumukila mu cipeela, dîna dyende Eliya. Katwena nansha bamanye kuvwaye mufumine to. Kavwa ne cilongelu ciine bwa kumujaadika to. Kadi wakajuuka, ne wakapiisha bintu byônso abi. Wakapiisha ndongolwelu yônso nkòong.

157 Bu yêyè mwa kumata mu cyalu, leelu ewu, uvwa mwa kupiisha ne wetu ndongolwelu pende.

158 Wakapiisha Izabela yônso. Nenku, ndekeelu wa byônso, yêyè mukaji awu ke wâkashiikija muprofeta. Kunyeemaye e kuya, bu Yone; kudyadijaye mwinshi mwa kaci kaa mupenga pavwa Izabela ukeba bwa kumushipa. Mukaji ewu uvwa mumukine.

159 Ne pashiishe tui tujandula ne paakalwa Yone, upatukila kabidi anu mu cipeela, munangi wa cipeela, mwikale ne mukenji wa buludi mutangija bakaji bavwa mu nsòmbelu wa bashipe mabaka balwe kubasela, ne kubaselulula, ukosa cintu aci bitupa bitupa. Kavwa mupatukileku mu cilongelu kampanda nansha. Uvwa mufumine yêyè kudi Nzambi, muntu mutuma kudi Nzambi. Uvwa upiisha bakaji baa cyena leelu, ubengangana naabo kashendende, kayiku mwa kudya cibanga nansha. Kadi uvwa wamba anu pa butooka ne dîbâ dikaavwa pabwîpi, Maasiya ukaavwa pa kwakula. Tangilaayi aci.

160 Mpindyewu fwanyikijaayi cikondo cya dilwa dya kumpala dya Eliya ne dya bamwe baa ku baprofeta baa leelu aba, balekela baabo ba-Izabela bakosa nsuki, bavwala tuputulu, banwa mfwanka, cyônso cidibo baswe kwenza, babalombola eku ne eku. Bipiciibwe ne kubenga kwamba cintu nansha cimwe, mukaji awu neamushiye, ukapeta mukwabo. Biikale babalombola eku ne eku ne twitabaayi myenza kudi bantu; aci's mbundu, malongesha a bantu. Nenku, mu kwenza kwa nanku, badi bavwija mikenji ya Nzambi kayiciyi ne bwenzeji to, bwalu badi mwa kukashaala beena ekeleeziya kadi kutungunuka anu ne kwikala beena Kilisto, ne kulama makenji abo ne kwamba mudibo beena Kilisto, ne kutungunuka anu ne kuya. Ke cidibo bakeba. Ke civwabo benza cikondo aci.

161 Kadi, vulukaayi ne, mpa dîbâ bu dya mushindu awu, bu mwakalaya Nzambi mu Maalaki 4 ne, Yêyè neùjè cyakabidi

Diyì. Aci ncyà bushuwa. Tangilaayi mwaba utudi leelu ewu, anu muvwabi menemene mu cikondo cya Yone, anu muvwabi menemene mu bikondo bikwabo.

¹⁶² Tangilaayi mwakajuuka ka-Amosa kaa kale, kalumyana kakulakaji. Katwena bamanye kwakafumaku to. Uvwa mulami wa bimuna. Nzambi uvwa umupatula mu mpàtâ ya didishila mikooko ne mpàtâ ya didishila ngombe, nenku, mwikale umwibidija. Kadi paakafikaye ku Samaaleya, ne paakabandaye e kuyaye kazangama pa mutu wa kakuna aku dituku adi, kutumaye mèsù lwa kwinshi aku. Ne dîbâ adi ditwa nsepe pa mutu wende wa dibâla awu, ne myedi mimane kukunzubila, ne mèsù ende matwangane miikale ne abalakana. Mèsù ende a muntu wa difwana dya Nzambi awu avwa apodya lubilulubilu, kabiyi bwa bintu bivwa babandidi beenyi baa myaba bamona pavwabo babwelamu to, mbwalu cimenga cijima civwa cidifile anu ku mpekaatu.

¹⁶³ Aka kaamuntu kaa katupa, kadi kakayi kajaadikibwe aka nkanganyi? Eyo, ng'Amosa, muprofeta. Wakamba ciprofeta mu cikondo cya Yelobama Mwibidî, mfumu uvwa mutwe cimpinga awu, wâkalekela bantu benza nî ncinyi cyônsò. Baakwidi bavwa bônso badibwinkemu biikale babiswe. Baakiibaka ekeleeziya ya mitambe bwîmpè. Bavwa ne mwadilu wa kapelu. Bakaji baabo bavwa ne nsômbelu wa masandi. Bavwa bavwala mushindu wônso naka uvwabo baswe. Babandidi beenyi baa myaba bavwa badikungwija myaba yônso, bwa kubandila bânâ baa bakaji balenga kwîsù ne mushindu uvwabo benza maalu a lukutukutu.

¹⁶⁴ Anu mukwabo États-Unis wa cyena leelu, utudi bamanye ne ke cisamba cya Nzambi. Muntu nansha umwe kêna wamba cintu pa bwalu abu to. Mbyenze anu bu bukole kampanda bukwate bantu's. Makumi atan- . . .

¹⁶⁵ Mbidimu dikumi ne mwandamukulu mpindyewu, leelu ewu! Rebekah wanyi wênjî ne bidimu dikumi ne mwandamukulu, leelu ewu. Bidimu dikumi ne mwandamukulu, bîndî nkosolola ditunga edi, mwikale mpiisha bintu ebi. Nenku pândî ngalukila, ku cidimu ne ku cidimu, kudi bakaji badi bakose nsuki yabo bûngî bupite buvwaku pângâakabangâ musangu wa kumpala.

¹⁶⁶ Muiishi munene, mwende luumu wa beena Mpenta uvwa mukambweje mu cibambalu kampanda, kukaadi bu cidimu cijima nanku, muntu mwîmpè maalu's, mumanya bîmpè, mumanyike buloba bujima. Wamba ne mêmè. . . "Mwaneetu Branham, itaba nkutenteketele byanza bwa nkusambidile."

Mêmè ne: "Ncyêna nsaama to."

¹⁶⁷ Yêyè ne: "Kadi kudi cintu cidi kaciyi bîmpè to." Yêyè ne: "Mwaneetu Branham, wêwè's neunyangakaje mudimu webe wa bwambi. Muntu nansha umwe kaakudisanga neebe mu mudimu to. Kabyena bikemesha to padi bayiishi kabayi badisanga neebe

mu mudimu; mbwa mushindu ûdì wêwè upiisha bakaji abu.”
Yêyè ne: “Bantu abu’s badi bakubiikila muprofeta.”

Mêmè ne: “Ncituku mwambe ne ke cîndi to.”

168 Yêyè ne: “Kadi’s badi beela meeji ne ke cyûdì.” Yêyè ne: “Ntu ngitabuuja cintu cimwecimwe aci.” Yêyè ne: “Wêwè utu mubiikidiibwe mbwa kusambidila babeedi.” Yêyè ne: “Wêwè sambidila anu babeedi, kadi lekela bakaji abu cyanaana. Udi ubatapa ku mwoyi.”

Mêmè ne: “Bishi?”

169 Yêyè ne: “Paudi wamba mudibo ne nsuki mikosa ne bikwabo.”

Mêmè ne: “S’mbibi.”

170 Bible mmwambe ne: “Mukaji udi—udi ukosa nsuki yende, bayende udi ne bukenji bwa kumwipata kushipa dibaka.” Cya bushuwa menemene. “Udi ufwisha mutu wende bundu.” Ke cidì Bible mwambe. Mpindyewu ncyêna mumanye ne nudi baswe aci anyi to, kadi ke cidì Bible mwambe, mu Kolinto wa Kumpala.

171 [Katupa kaa mukaba wa mêyi munda mutupu—Mf.]... cyonye dikoba ndendende mu mushindu wa dikoba dishaale dimweneke ne pambelu. Nenku pashiishe ba—balwa apu, kadi kwamba ne: “Mona’s Mukalenge Branham, s’ke mushindu wônsò wa bilâmbâ bidibo basumbisha.”

172 Bacitu anu ne bintu bya disumbisha ne mashinyi a bilâmbâ. Kakwenaku kabingila to. Bakaji baa ba-Amish ne baa ba-Dunkard bacitu anu babivwala. Cya bushuwa. [Disangisha didi dituuta bikashi—Muf.]

Nenku cidì cyenzeka ncinyi? Badi bapatuka pambelu paapa benza maalu a macimbu.

173 Mukaji mukwabo wakamba ne: “Ee, Mukalenge Branham, mêmè ncitu mvwala tuputulu to. Ntu mvwala tup-...” Bitu mbinganyi biine abi, kapanu kashiikile mu mabund-... [Mwaneetu wa balume mukwabo udi wamba ne: “Kapanu kashiikile mu mabunda.”—Muf.] Eyo. Yêyè ne: “Ke kântù mêmè mvwala.”

174 Mêmè ne: “Aci’s ncibi kupita.” Mêmè ne: “Bible udi wamba ne: ‘Ncinyangu bwa muntu mukaji uvwala ciwvalu cidì cikumbanyina muntu mulume.’” Nenku mmushindu kaayi wa mmwenekelu mukooyike udi nende États-Unis ewu patudi twakulangana apa! Nwamonu anyi? Ncyâ bushuwa’s.

175 Lekela nkwambile cintu kampanda, mwaneetu wa bakaji. Udi mufwanyine kwikala mukezuke anu mudi cilôngò cya mbata, kumpala kwa bayeebe anyi kwa mubangila webe, kadi mu Dituku dya Cilumbulwidi neulumbulule bwa ne wâkenda masandi. Yesu wakamba ne: “Ewu yônsò ukatangiidi mukaji, bwa kumwalakana, wamanyi kwenda nende masandi.”

Piikala ngènzàmpèkààtù awu mukutangile, nenku mukaji awu nealumbulule mu Dituku dya Cilumbulwidi. Wèwè ngudi mudileeje kudiye. Enza mùdì muswe. Uh-huh.

¹⁷⁶ Mukaji wa difwana dya Nzambi mmufwanjine kujinga kuvwala mushindu awu bwa cinyi? Pashiishe wèwè kubanga kulaka mukana mùdì ne Nyuma Mwîmpè ne bwalu nyawu utu mwakule mu myakulu ne munyeemakane wabanda wâpweka panshi apa? Aci, nansha nanku, mèmè's nkaadi mumonemone bampanganu babyenza, ba-Hottentots. Nyuma Mwîmpè mbukezuke, wa cijila, ne kayi mukooyike to. Cya bushuwa.

¹⁷⁷ Muntu awu kwambaye ne: "Pawikala. . . Batu biitabuja ne udi muprofeta. Mbwa cinyi kuyi ubayiisha mushindu wa bôbò kupeta mapà manena a Nyuma, ne wa kwenzabo bintu bwa Nzambi? Bwa cinyi kwêna ubalongesha byôbi abi pawikala muprofeta?"

¹⁷⁸ Mèmè ne: "Mmunyi mùndì mwa kubalongesha makumi a algèbre padibo kabayi nansha baswe kulonga maleeta a ABC?" Nudi bamanye cidi ABC uumvwija? "Always Believe Christ" [mumwe ne: "Kwitabuuja Kilisto Misangu yônsò"—Muk.] Uh-huh. Mmunyi muwenza ciine aci? Nwamonu's, udi muswe kubanda kuulu *kwaka*, pamutu paa kubangila kwînshi *eku*.

¹⁷⁹ Nzambi mmuswe kwibakila Ekeleeziya Wende pa bishimikidi bya Yesu Kilisto, ne byôbi abi ke Bible. Bwa pa kuumusha aci, myaba mikwabo yônso idi ndunteka. Nzambi katu ushintuluka to. Ngii kadilu Wende katu ushintuluka to.

¹⁸⁰ Yèyè mmwenze bakaji bashiilangane ne balume, ne balume bashiilangane ne bakaji. Mmubavwadike bishiilangane, ne mmuswe bwa kushaalabo mushindu awu. Nwamonu anyi? Bakaji mbajinge kumweka bu balume, ne balume mbajinge kumweka bu bakaji. Kaa, ekelekele! Dikudimika kaayi's we! Cidi. . . Nenku cintu cyônsò mu kaabujima, bidi bimweka anu bu bukole kampanda bukwate bantu, kuyi mushindu wa kubishintululaku to. Bimweka mu cilengulengu cinene, mufitu munene; nwènù bumvte bìndi ngamba ebi, mu nyuma. Cilengulengu kampanda ncikaadi cimane kubapya nzadi, nenku kaba—kabayi mushindu wa kutuukaku to; Hollywood bûngì cyanaana, télévisiion bûngì cyanaana, lukutukutu lukwabo bûngì cyanaana. Bitudi naabi byônsò bikaadi bikooyike. Kakuyi mpatà ne: "Mudimu wôwò kawuyi mwipidija to, bwa Basungula, kakwakwikala musunya wasungidiibwa nansha umwe."

¹⁸¹ Wambi ne: "Ncivwa mumanye aci kwônso eku to." Ee, bwa mpindyewu wacimanyi, kubangila ku mpindyewu. Wamonu anyi? Aci cidi. . . Mbîmpè ngimanyike bwalu abu. Twalukilaayi paanyima. Monaayi.

¹⁸² Yone uvwa cimanyinu. Kabidi nwavulukaayi ne, mushindu wâkacyènzà Nzambi musangu wa kumpala, mushindu awu ke wâcyènzàYe kabidi. Yèyè ngwâkalaya bwa kucyenza.

Mpindyewu, Nzambi katu mwanji kwenzaku mudimu ne musumba wa bantu to, kacyapu, bwa cintu bu nanku.

¹⁸³ Vulukaayi ne, kuvwa musumba musangu kampanda, uvwa ne, muntu munene dyende Aakaba, wakadipetela... wakadipetela baprofeta nkama inaayi baa beena Izaleela. Mpindyewu, bôbô abu kabavwa baprofeta baa bampanganu to. Baprofeta nkama inaayi baa beena Izaleela. Bônsò bavwa muntu ne muntu ne dipolome ne bikwabo byônsò, uvwa ne cilongelu cinene.

¹⁸⁴ Kuvwa muntu kampanda wa difwana dya Nzambi dyende Yehoshafata, uvwa mfumu wa Yuda, ke kupweka kulwaye. Ke mwaba awu uvwa mwena kwitabuuja mukadibwejakaje ne mwena bupidya. Maalu kadi kunyangukawu.

¹⁸⁵ Ke kwambaye ne: “Laamota-Gilada...” Mpindyewu tangilaayi eci, mushindu udici cifwanyine kwikala cilelela. Yêyê ne: “Laamota-Gilada ngwetu twêtù, mwaba wawa. Lwa mu citupa cya buloba cyacya naka, ncyetu twêtù.” Yôshuwa, mu kwabanya kwa malaba, wakamupa Izaleela. Kadi beena Peleshete, bampanganu, kulwa e kubanyengayi. Yêyê ne: “Ngwetu twêtù.”

¹⁸⁶ Mpindyewu tangilaayi, bilondeshile maalu mudiwu menemene, bantu mwa kwikala babinge kadi nansha nanku kuCipangila. Cintu aci mu bushuwa bwa bwalu civwa ncy Izaleela. Kadi milayi ya Nzambi yônsò, mwaneetu, itu anu ku mishingà, nwamonu’s: “Piikalabi ne badi benda kumpala kwa Mukalenge.”

¹⁸⁷ Mpindyewu tangilaayi kunu. Yêyê kwamba ne: “Udi muswe kuya naanyi, kunkwacisha bwa mêmè kwangatulula buloba abu anyi? Ee, mbwena kwamba ne, bânà baa beena Peleshete baba badi buuja mafu muntu mwamwa, ne blé wa Izaleela.” Aci mmwômô bilondeshile Mifundu. Yêyê ne: “Unkwacishe bwa kuyamu ne kubakwata.”

¹⁸⁸ Awu ne: “Ee, baanyi. . .” Mwaba awu ke wakenzelaye cilema cya yêyê kayi mwele meeji to. “Makalu aanyi a mvita’s ngeebe wêwè, bantu baanyi mbamwe ne beebe. Nênye neebe.”

¹⁸⁹ Kadi pa dîbà adi Yehoshafata kubangaye kwela meeji, nudi bamanye. “Amba tũng, kabyenaku bikengela twêtù kwanji kukonka Mukalenge kumpala kwa kuya anyi?”

¹⁹⁰ “Kaa, mu bushuwa bwa bwalu,” mwakamba Aakaba, “cya bushuwa. Uh-huh. Umfwe luse. Bivwa bikengela mêmè—mêmè kwikala mutumeku meeji ku bwine bwalu abu’s.”

“Kakwenaku muprofeta mwaba kampanda anyi?”

¹⁹¹ “Kaa, bushuwa’s. Ndi ne—ndi naabo se—seminere mujima mwaba ewu, balenga baa menemene baudi kuyiku mwanji kumonaku to. Badi bônsò ne mvwadilu wa kapelu. Bôbô

mbamanyi baa mabala baa kapelu. Mêmè ngudi mubape dilongesha, dya kalàndààmüsèngà. Netuye kabangata.”

¹⁹² Ke kupwekabo kuntwaku. Nenku kubahangishabo pamwe. Kabavwa ne bya lubombo nansha. Bôbò kusambila kusambila kusambila, too ne mwakamonabo cikeena-kumona.

¹⁹³ Ke pashiishe kubandabo. Nenku umwe wabo ukaavwa mudyènzèle nsengu minene ibidi ya cyamu cifiike. Yêyè ne: “Ku yôyì eyi ke kuwikala mwa kusukuma beena Peleshete, anyi beena—beena Ashu, too ne pambelu paa ditunga.” Yêyè ne: “EMU MMUDI MUKALENGE WAMBA. Ndaaku, Mukalenge udi neebe.” Umwe ne umwe wabo, dîbà adi, ne dîyì dimwe, kutuukabo nyuma. Baprofeta baa beena Izaleele abu kwambabo ne: “Ndaaku, Mukalenge udi neebe.” (Udi wamba ne: “Aci ncyà mu Mifundu anyi?”) “Nzambi ngudi mufile bumpyanyi ebu kudi cisamba, kadi mwena lukuna ukaadi yêyè naabu. Wêwè udi ne bukenji bwa kuya kabwangata.”

Mpindyewu, Mpenta, ndi muswe nuyiile dileesona apa.

¹⁹⁴ Kadi Yehoshafata, bu muvwaye muntu wa difwana dya Nzambi, kwambaye ne: “Kucidi anu cintu kampanda cipampalamuke ndambu.” Yêyè ne: “Kwenàku ne mukwabo anyi?”

¹⁹⁵ “Mukwabo kabidi, paanyima paa baprofeta nkama inaayi balongesha bîmpè biimane mwaba ewu?” Búngì anu bu bwa badi mu nzubu wa panshi ewu aba. “Biimane ne dîyì dimwe, bamba ne: ‘EMU MMUDI MUKALENGE WAMBA.’ Kucipindulula, kadi kwamba ne: ‘Yoshuwa ngwâkatûpa buloba abu. Mbwetu twêtù. Ndaaku ùbwàngatè!’”

¹⁹⁶ Kadi Yehoshafata yêyè wakalomba mukwabo. Yêyè ne: “Kakwenaku mukwabo kutudi mwa kukonkela Mukalenge anyi?”

¹⁹⁷ Yêyè ne: “Kaa, kudi mukwabo, kadi,” ke yêyè, “mêmè ntu mumukine.” Uh-huh, uh-huh. Yêyè ne: “M’Miika, mwànà wa Imla.” Yêyè ne: “Ntu mumukine. Yêyè utu misangu yônsò anu wamba bintu bibi bwanyi mêmè.”

Yêyè ne: “Mfumu kaakulu nanku to. Bakamwangate.”

¹⁹⁸ Ke kutumabo banyeemi baa lubilu kampanda kuntwaku. Ke umwe wa kudibo kwambaye ne: “Mpindyewu, Miika, ndi njinga kukwambila bwalu. Mpindyewu, s’udi mumanye ne mbakwipate mu bwobumwe, . . . -kwipate mu dyumvwangana, anu abidi adi panshi aa, bwalu wêwè utu anu wamba bintu bibi bwa bantu. Bwa mpindyewu pawaswa kupetulula karta keebe kaa bu mambala, wămbè cintu cimwecimwe cidibo bamba bôbò aci, nenku, kaa, bôbò’s nebakwele mu diboko ne lukasa lwônsò.”

¹⁹⁹ Kadi kwenzekabi ne yêyè uvwa muprofeta anu wa bulelela ewu. Yêyè kwamba ne: “Bu mudi Mukalenge Nzambi ne mwoyi, mêmè nêngâmbè anu cyateeka Mukalenge mukana mwanyi aci.”

Kaa! Nzambi abeneshe muntu awu. Yèyè ne: “Indilaayi too ne bufuku ebu, nenku nêmmônè cyangambila Mukalenge aci.”

²⁰⁰ Paakacyabu mu dinda, yèyè kwamba ne: “Ndaaku, kadi ndi mumone Izaleela mutangalake byenze bu mudi mikooko kayiyi ne mulami to.” Pashiishe kwangataye cikeena-kumona cyende e kucifwanyikijaye ne civwa Eliya mwambe, civwa cyenzekele Aakaba. Mmunyi muvwaYe mwa kubenesha cikaavwa cimana kwela mulawu? Nansha byôbi ne. . .

²⁰¹ Twêtù’s tudi ditunga didi ne difwana dya Nzambi. Ekeleeziya wa beena Mpenta, ba-Baptistes, ne ba-Méthodistes, ne bikwabo, ng’ekeleeziya wa beena Kilisto, kadi mmunyi munudi mwa kubenesha cikaadi Nzambi mwele mulawu? “Kakwena bwalu to,” mûdi wamba, “mêmè—mêmè nkaadi mwena *cikampanda*. Ndi mwenze *cikansanga*.” Aci kaciyena cipetangana ne cyôci aci to. Tangila cinudi benze. Tangila Mpenta, mukaadibo balekelele biibi. Tangila cinuvwa biikale pa ciibidilu, kadi tangila cinudi mpindyewu. Kabiya bikemeshaku to, mèsù adi, mèsù mmafofomija.

²⁰² Pashiishe yèyè, Aakaba, mu. . .Mwakwidi ewu kadi kumutapaye dipi ku mishiku. Ke yèyè ne: “Mwelaayi,” Aakaba ngwâkamba awu, “mwelaayi mwamwa mu kazubu kaa munda kaa buloko amu. Pângâlulukilâ mu ditalala, nêmmônè cya dyenza ne mulumyana awu.”

²⁰³ Yèyè ne: “Wèwè anu mwalukile, Nzambi kî mmwakule naanyi to.” Uh-huh? Nwamonu anyi? Kuvwa muprofeta, kuvwa cimanyinu; kuvwa Dìyì Dyende. Nenku, kupanga kucitumikila, kuvwa kutwala dilumbulwisha.

²⁰⁴ Nyuma Mwîmpè ke wetu muprofeta leelu ewu. Kupanga kuteeleja Dìyì Dyende? Mmujaadikiibwe mu Mifundu, bwa ne Yèyè nguvwa mwa kwamba bintu ebi. Yesu Kilisto, mu mmwenekelu wa Nyuma Mwîmpè!

²⁰⁵ Nzambi uvwa ukwata mudimu ne muntu umwepele ewu. Eci, Nzambi katu ukwataku mudimu ne bisumbu to; nne muntu umwepele. Eliya kavwa cisumbu to. Yone kavwa cisumbu to. Kabavwa cisumbu anyi dingumba to, nansha umwe wa kudibo. Kadi bubidi bwabo baakapiisha bya nanku. Ncya bushuwa. Yone wakamba ne: “Kanûdyâmbîdidî ne tudi ne Abraham bu taatu wetu to. Nzambi udi ne bukole bwa ku mabwe aa kajuudila Abraham bânâ.”

²⁰⁶ Nenku cimanyinu cya cikondo cya kunshiikidilu neciikale ne Dìyì dya cikondo cya kunshiikidilu. Ne cimanyinu cya cikondo cya kunshiikidilu neciikale bilondeshile mudibo badyanjile kwamba mu Bible. Ne Dìyì dya cikondo cya kunshiikidilu, didi dilonda cimanyinu cya cikondo cya kunshiikidilu, neciikale cijaadikibwe anu menemene mu Mifundu, nediikale Mufundu udi mulayiibwe.

207 Mpindyewu twâbadi mu Luuka 17 ciikala cimanyinu cya cikondo cya kunshiikidilu, neciikale mwakadibi mu Sodoma, mulayi. Nenku tudi ne Sodoma wa mu mubidi awu, bwa cinyi katuyi mwa kwitabuuja cimanyinu mu nyuma mwaba ewu? Bu nwênù ne mushindu wa kumona Mifundu, kabidi, Luka 17 ncimanyinu, ne Maalaki 4 n’Dîyì. Cimanyinu civwa bu Nzambi mumweneshiibwe mu mubidi, umanya maalu masokome a mu mwoyi; ne Dîyì dya Maalaki 4 divwa nkukudimuna bantu kubuumusha ku twitabaayi yabo, kubaaluja ku Diitabuuja dya baataatu. Ke cimanyinu ncyaci.

208 Nudi bamanye mudi bwalu? Nkaadi njikija mpindyewu. Bimanyinu bitu anu biitabuujiibwa pa ciibidilu, bushuwa; kadi, Dîyì dyôdi, kaa, to. Dîyì didi dilondâ cimanyinu, kabeena naadi bwalu to. Eyowa.

209 Cimanyinu cya Yesu, bu Maasiya, bwa kwondopa babeedi, aci kaayi baakaciitabuuja. Kadi dîngâ dituku Yêyê kwamba ne: “Mémè ne Taatu tudi umwe.”

210 Kaa, ekelekele, adi Dîyì kabaakadiitaba to. Baakamba ne: “Udi udivwija Wêwè mwine Nzambi, mwikale mwomumwe ne Nzambi.”

Yêyê kwamba ne: “Mémè ndi Mwânà wa Nzambi.”

211 “Kaa, ekelekele, mmunyi muvwa Nzambi mwa kwikala ne Mwânà? Nwamonu’s, kabyena mwa kwenzekaku bwa Nzambi kwikalaye ne Mwânà to!”

212 Kadi, nudi numona’s, baakiitabuuja ci—cimanyinu, babeedi bavwa mwa kwondopiibwa, nenku, kaa, aci civwa cilenga cya dikema, civwa anu cîmpè be. Kadi pakaavwabi ne mbwa Dîyì, kabaakaswa kwitabuuja Dîyì nansha. Bavwa mwa kwenza cinyi? BaakaMwela pambelu.

213 Kadi nudi bamanye mudi bwalu anyi? Bible udi utwambila, mu Bwakabuulwibwa mu nshapita 3, mu Cikondo cya Ekeleeziya wa Laodikiya, ne bavwa mwa kuMwenzu cintu cimwecimwe aci. Uvwa pambelu paa ekeleeziya. Ke Dîyì dimweneshiibwe adi. Yêyê uvwa Dîyì dimweneshiibwe. Udici kabidi anu Dîyì dimweneshiibwe.

214 Bu nwênù mwa kwitabuuja cimanyinu cya Sodoma, cya Luuka, bu nwênù mwa kwitabuuja cyôci aci, kadi mbwa cinyi kubenga kwitabuuja Dîyì dya Maalaki 4? Nwamonu’s, bwa cinyi wêwè to, wêwè? Cidi mwa kushindikiiibwa. Mushindu umwepele udici mwa kwenjiibwa udi. . . Cimanyinu cidi mwa kujaadikiibwa, kadi bikengela wêwè kwitaba Dîyì.

215 Môsà wakatumiibwa ne mudimu wa kupwekaye, mu mubidi ewu, kuya kangata cimanyinu cya mu nyuma ne kubiikila bantu bwa kwalukila ku mulayi wa baataatu.

216 Budi Maalaki 4 naabu mbwa kwaluja bantu “ku Diitabuuya dya baataatu.” Kaa, alukilaayi, Eyi nwênù bampofu ne badi batangalake, kudi baa kwenu!

217 Bwa kujikija, nêngâmbè nunku ewu, diyî dya ndekeelu edi. Muprofeta wakamba ne: “Nekwikale Bukênkè ku dîbà dya diloolo.” Tangilaayi, wakamba ne: “Nekwikale dituku kadiyi difwanyine kubiikidiibwa ne mmundaamuunya anyi mbufuku to.” Mpindyewu teejeaayaaku. Nkaadi njikija. “Nekwikale dituku . . .” Lekelaayi eci cipweke ne mu ndondo, ne Nzambi anyisheku aciteeke mu mwoyi ne mwoyi wa cisumbu eci, diloolo edi, mu dibalaasa emu. Muprofeta wakamba ne: “Nekwikale dituku kadiyi difwanyine kubiikidiibwa ne mmundaamuunya anyi mbufuku to, dituku dyenze bu dya dibungama nanku awu, dya mvula, dya mafwima. Kadi,” mwakambaye, “ku dîbà dya diloolo, nekwikale Bukênkè.”

218 Mpindyewu, vulukaayi ne, dîbà ditu misangu yônsò dijuukila anu ku Esete diikale diya ku wesete. Dishidimuka ndilonde dîbà. Nutu bamanye aci. Nenku, monaayi, dîbà dimwedimwe ditu dijuuka ku Esete adi nditu dikabwela ku Wesete. Mpindyewu, dishidimuka ndyenze lwendu anu ne dîbà menemene, mu mushindu wa ne patudi twakulangana apa Esete ne Wesete bikaadi bitwilangane. Tudi ku Côte Ouest; Esete ne Wesete.

219 Nenku, vulukaayi ne, Evanjeeliyo mmwenze lwendu anu mushindu umweumwe awu. Mmujuukile ku Esete, dilwa dya Yesu Kilisto, M-w-â-n-à [S-o-n, mu Anglais—Muk.], pa kuumusha d-î-b-à [s-u-n] to. M-w-â-n-à, Mwânà wa Nzambi, wakajuukila ku Esete, kudi bantu baa ku Esete.

220 Nenku mpindyewu nkulwe dituku didi bantu badivwije beena ekeleeziya, benze mangumba, anu ndambu mukumbane wa bukênkè bwa kumona: “Ee, netupete ekeleeziya. Netwibake *cikampanda*. Netwibake cilongelu. Netwibake lupitaadi. Netulongeshangane tulaasa. Netupete seminere.” Mbapete bukênkè bukumbane bwa kwenza biine abi.

221 Kadi, nwavulukaayi ne, Bible mmwambe, muprofeta wa Mukalenge, mu Bible, udi EMU MMUDI MUKALENGE WAMBA: “Dîbà dimwedimwe dyakateema ku Esete adi ke dyateema kabidi ku Wesete, ku dîbà dya diloolo. Nekwikale Bukênkè ku dîbà dya diloolo.”

222 Ncinyi cyenzaYe? Aci cidi cyenza anu menemene cyakambaYe mu Luuka nshapita wa 17. “Ku cikondo cya kunshikidilu, piikala Mwânà wa muntu munkaci mwa kubuuludiibwa mushindu umweumwe wakabuuludiibwaYe ku Esete awu, Dîbà dimwedimwe adi diikale diteema, Bukole bumwebumwe abu, Nyuma Mwîmpè umweumwe awu, Cintu cimwecimwe aci ciikale cyenza cintu cimwecimwe aci. Nekwikale Bukênkè ku dîbà dya diloolo.”

223 Dîbà dimwedimwe adi didi dyenze lwendu; M-w-â-n-à umweumwe awu mmwenze lwendu; mupweke mulwe kupicila ku Esete, kuumukila kudi Pôlò; kutupikila mu Allemagne, pa Martin Luther; kutupikila kabidi, pa nkokelu Wende wâkalonda; ke kuumukila ku aci kuya mu Angleterre, kudi John Wesley; kutupika kupicila mu Mbû wa Atlantique, kuya mu États-Unis, mu Mpenta; kadi mpindyewu Mpenta wâshêèpekeci, nenku tukaadi pa Côte awu.

224 Yônsò wa kudibo, mmudyënzè dingumba, anu mwakenzabo ku cibangidilu, benze bulongolodi bûtù Nzambi mwele mulawu abu. Mpenta, ne bônsò abu, mbenze cyôci aci.

225 Kadi Yêyè wakamba ne: “Nekwikale Bukênkè ku dîbà dya diloolo. Nekujuuke cimanyinu ku dîbà dya diloolo.” KaCinupici to, balunda baanyi. KaCinupici to. Mpindyewu, Mwânà umweumwe awu neafile Bukênkè bumwebumwe abu. D-î-b-à dimwedimwe adi didi difila bukênkè bumwebumwe bwa d-î-b-à abu. M-w-â-n-à umweumwe awu udi ufila Bukênkè bumwebumwe bwa M-w-â-n-à abu.

226 Mpindyewu, awu kî mmêyi aanyi mêmè to. Muntu yônsò udi mwab’ewu, udi mumanye ne Bible ngudi mwambe nanku, elaayi byanza muulu. [Disangisha didi dyamba ne: “Amen.”—Muf.] Aci ncyá bushuwa menemene.

227 Mpindyewu, nudi anu mwa kucyenza, ncinutangile. Itabuujaayi ne Mwânà wa Nzambi, Yesu Kilisto, udi ne, kî mmufwe to. Udi ne mwoyi. Udi mu didipwekesha, mudipwekeshe. Utu misangu yônsò musòmbe mushindu awu. Njila wa kubanda nkupweka. Dipwekeshaayi, shiyanganaayi ne mmwenenu yenu ya myumakane ayi, ne itabuujaayi Mukalenge Yesu. Monaayi cimanyinu, pashiishe nwitabuuje Dîyi. Alukilaayi, Eyi nwênù badi batangalake, kudi baa kwenu!

Twinyikaayi mitu yetu.

228 “Nenku piikalabo kabayi biitabuuja Dîyi dya cimanyinu cya kumpala, mu cyanza, bu mwakadibi ne Môsà, pa dîbà adi wënzè cimanyinu ciibîdi. Pashiishe, piikalabo kabayi biitabuuja eci cimanyinu, pa dîbà adi wangate mâyi (mâyi adi aleeja mwoyi) adi mu mbû munene anyi mbû mukese, uàpòngòlòlè panshi, neandamuke mashi.”

229 Taatu wa mu Dyulu, dîbà ndipite anu cya bushuwa mpindyewu, kadi Wêwè ngudi mulaye ne nekwikale Bukênkè ku diloolo. Enzaku ne Dîyi dya Evanjeeliyo wetu dipweke too ne mu kandondo kaa myoyi ya bantu, padibo beelangana meeji pa Dyôdi ne badilonga ku Dîyi apa.

230 Benesha cisumbu eci, Mukalenge. Benesha bantu aba. Mona mudibo basòmbe mwab’ewu, bânà ne nzala, bakwate ne bya luse biikale babasakila ne babacincimika eku ne eku, ne eci, bu mutudi bamanye ne Sataana mmwenze ciine aci anu bwa kubafomija bwa kabamonu cintu aci paafikaCi kuntwaku.

Swaku, diloolo edi, ne dîyì dimwe, biitabuuje Yesu Kilisto, biitabuuje mulayi Wende, ne Yèyè mmubiike ku bafwe.

²³¹ Wèwè wâkamba ne: “Pa dîbà didibo kabayi beelela meeji to, pa dîbà adi ke paalwa Mwânà wa muntu.”

²³² Anu padi ekeleeziya ne wapeci, mukumbanyine kwikala ne mfranga yâbûngi, wela miliyô ya ndola mu diibaka dya nzubu. Bavwa mwa kwikala bîmpè menemene, Taatu, mûndi ngitabuuja, bu bôbò biimane kuulu mu disangu, bimba kaa—kaadikasa, ne cifulu mu cyanza, ne ngoma mukulakaji mu disangu bu beena Armée du Salut, pamutu paa kwikala basômbe mu nzubu minene ya bitalu eyi diloolo edi, bateeta bwa kutentula baa pa buloba: “Biikale ne cimwenekelu cya difwana dya Nzambi, kadi babenga kwitaba Bukole bwadi.”

²³³ Twënzèla, Mukalenge, diloolo edi, musangu umwepele kabidi, Mukalenge; mwakeela Shimishoona lubila ne: “Musangu umwepele kabidi, Mukalenge, musangu umwepele kabidi.” Bimanyiibwe ne Wèwè udi Kilisto, Mwânà wa Nzambi; umweumwe awu makeelela, leelu, too ne kashidi. Nenku difwanyikijaaku Wèwè mwine munkaci mwetu, bwa bamone cimanyinu, pâmwâpa nebiitabuuje Dîyì. Mu eci, ke mûndi ndomba mu Dîna dya Yesu Kilisto. Amen.

²³⁴ Netubiikile mulongo wa babeedi, lukasalukasa. Ngâmònu ne dîbà ndikumbane anu mpindyewu mene dya twètù bamane kutangalaka. Kadi twënzààyi mulongo wa babeedi, mulongo wa babeedi mukese cyanaana, pashiishe netubange maalaba.

²³⁵ Mmwabanye twarta twa disambila leelu ewu. Ke bwa cinyi, tutu twabanya twarta dituku dyônsò, bwa muntu ne muntu apete mushindu wa kulwaye, cikondo cya bwalu bukole. Kujuuka kwimana mu mulongo wa babeedi, aci kî.ncidi cikwondopa to. Muntu kana yônsò ewu mmumanye, mu disangisha dyônsò, ne kutu bantu badi bondopiibwa pambelu paapa kutamba badi bondopiibwa apa nenku, nwamonu's, misangu yônsò. Nyuma Mwîmpè utu anu myaba yônsò. Yèyè udi ukeba anu bwa kupeta beena kwitabuuja, kwajiki, kudiYe mwa kufika.

²³⁶ Mbaabanye twarta twa disambila twa P, bu mu Paul. Twënzààyi, mwaba utuvwa...Ee, tubiikile kubangila ku umwe. Umwe, ibidi, isatu, inaayi, itaanu, isambombo, mwandamutekete, mwandamukulu, citeema, dikumi, biimane kuulu lwa apa, bu nwènù mwa kwanyisha. Karta kaabo kaa disambila kaa P, bu mu Paul, umwe too ne ku dikumi, imanyinaayi lwa apa ku elu luseke, panwikala ne mushindu wa kajuuka. Pawikala kuyi ne mushindu to, nanku netwambile muntu bwa kukukwacisha. Dikumi; umwe, ibidi, isatu, inaayi, itaanu, isambombo, mwandamutekete, mwandamukulu. . .Eyo, tukwabo tubidi. Mwandamukulu, citeema, ditumi, eyo. Dikumi too ne ku dikumi ne itaanu, dikumi too ne ku dikumi ne itaanu, atu ntukwabo tutaanu. Dikumi ne itaanu too ne ku makumi

abidi, juukaayi bwa mmone ne nudi mwa kujuka; P, dikumi ne itaanu too ne ku makumi abidi. Makumi abidi too ne ku makumi abidi ne itaanu. Tumonaayi mpindyewu, mwaba wònsò ûdì usanganyibwa. Mpindyewu bakwabo baa ku bateeleji biikale mu kaneemu kaa menemene, bwa ndambu wa tusunsa cyanaana. Mbifwanyine kwikala karta kaa disambila kaa P, umwe too ne ku makumi abidi ne itaanu. Kî mmwòmò anyi? Makumi abidi ne itaanu, umwe too ne ku makumi abidi ne itaanu.

²³⁷ Mpindyewu bakwabo bònsò biikale mu kaneemu kaa menemene. Nupe Nzambi kaneemu kaa mushindu awu, nukape Mukenji. Nudi ne cya kukapa Nzambi, kutangila katanci ne kwelangana meeji.

²³⁸ Mpindyewu ndi ngela meeji ne badi munkaci mwa kufikisha bantu ku didilongolola. Aba badi kabayi. . . Piikalabi ne badi ne karta kaa disambila, bònsò kabayi beele mulongo to, nebajandule; nebangambile mu tusunsa tukese emu, nenku pashiishe nebiikale mwa. . . pashiishe netumone pàmwàpa muntu mpudimaci anyi muntu kampanda kayi ne mushindu to.

²³⁹ Ncyèna mumanye ne twine atu tudi penyi to, balunda baanyi, twarta twa disambila atu, mwanaanyi wa balume udi upweka apa. . . (Uvwa mutwábànye nganyi? Ngwèwè, anyi m’Billy? M’Billy?) Nenukuyèye udi upweka apa, ucyompakaja twarta atu, kumpala kwenu, pashiishe ukupa karta kaa disambila; upweka apa, unwambila bònsò bwa kusòmba, ukupa karta kaa disambila. Nwamonu anyi? Mèmè ncyèna mumanye ne twòtò atu tudi penyi to. Ndi muditacishe bwa kufikisha mwànà ewu apa, nwamonu’s. Nenukuyèye, tukwabo, tûndì nciyi—nciyi mumanye to, ncyèna—ncyèna ne mushindu wa kumanya abi to. Ngela meeji ne Nzambi ngudi anu ukateeka pa mwaba mu mushindu udiYe muswe kukateeka awu.

²⁴⁰ Mpindyewu, mpindyewu bakwabo beenu, badi kabayi ne karta kaa disambila. Ela cyanza muulu, wamba ne: “Ncyèna ne karta kaa disambila to, kadi ndi nsaama.” Ela cyanza muulu, nansha penyi mu nzubu emu. Nansha wèwè usanganyibwa penyi, ela cyanza muulu. . . Ee, nanku kakwena bantu bapitepite bûngì mwaba ewu to, mpindyewu. Ee, bilondeshile cyôcì aci, kabyakutwanga ntanta mule menemene mpindyewu bwa kusambidila mulongo wa babeedi maalaba to. Kudi bantu bu makumi abidi muneemu munda emu, pa kuumusha badi biimane kuulu mwaba ewu aba, badi basaama.

²⁴¹ Abi mbîmpè. Ndi ne disanka dya kunumona nuciitaba mushindu awu. Nudi bapete diitabuuja dyabûngì kupita mûmvwà mèmè nnwelela meeji, pàmwàpa. Nwamonu anyi? Nwamonu anyi? Pawikala mwitabe dyondopa dyebe, mwimanshe karta keebe, Nzambi akubeneshe. Ke diitabuuja dishuwashuwale ndyôdi adi. Muntu nansha umwe nyawu kayi

mukutentekele byanza; wêwè ngudi mutenteke byanza byebe pa Kilisto.

²⁴² Mpindyewu nwênù badi apa diloolo edi, biikala kanuyi nubwela mu mulongo wa babeedi, itabuujaayi bwalu bündi ndonda ebu. Bu muvwa mukaji wâkalenga luzemba lwa cilâmbà Cyende, nenku Yêyè kukudimuka kadi kujingulula ne yêyè nguvwa muMulenge, mbanganyi badi bavuluka bwalu abu? Ncya bushuwa, nudi bavuluke.

²⁴³ Mpindyewu nudi nwitabuuja ne, Yêyè, Bible mmwambe mu Ebelu 4, ne: “Yêyè udi Mwakwidi Munene, mpindyewu mene, udi mwa kuumvwa padi mateketa etu amulenga” anyi? [Disangisha didi dyamba ne: “Amen.”—Muf.] Ee, piikalabi ne Yêyè udi umweumwe awu makeelela, leelu, too ne kashidi, Yêyè kî mmufwanyine kwenza cintu mushindu umweumwe awu anyi? [“Amen.”] Yêyè kî mmucyënzèku, diloolo ne diloolo dyônso, mwab’ewu anyi? [“Amen.”] Mbanganyi bakaadiku babwele mu masangisha makwabo kadi kuMumona ucyenza? Juukilaayi anu kuulu. [“Amen.”] Cya bushuwa. Nwamonu anyi? Pa buloba bujima! Yêyè mmumanye, Yêyè mmumanye maalu ebe ônsò.

²⁴⁴ Mpindyewu nudi numona cîndi nteeta kwenza anyi? Mbanganyi badi bumvwa cîndi muswe bwa nwênù kwenza? Nwamonu anyi? Ndi muswe ne, kakuyi muntu mukutentekele byanza to, ndi muswe ne, bu mûdi wêwè cintu cishuwashuwale cya Nzambi, wâmbè ne: “Yesu Kilisto, ndi muKwitabuuje. Ndi mpindyewu nKwitaba bu Mwondopi wanyi. Ndi mpindyewu nKwitaba bu Musungidi wanyi. Ndi ngitabuuja nanku ne mwoyi wanyi wônso, mudimu waci mmumana kwenza.” Pashiishe shaala mukwate mulayi awu, shaala mukwate ditonda dyebe kadi uye anu naadi kumpala. Tangila umone cidid cyenzeka. Nwamonu anyi? Tangila umone cidid cyenzeka. Nwamonu anyi? Mpindyewu ke cyôci aci cîndi nkeba kunufikisha ku dyanza, mushindu mulelela utudi ne cya kwitabuuja.

²⁴⁵ Udi ujinga kwamba bishi? [Muntu udi wamba ne: “Inaayi ne dikumi ne citeema.”—Muf.] Nomba inaayi, karta kaa disambila nomba inaayi ne nomba dikumi ne citeema, ntupangike. Karta kaa disambila inaayi. Tapa dîsù kudi muntu kampanda; tapa dîsù ku twarta twa beena mutumba neebe. Karta kaa disambila nomba inaayi ne nomba dikumi ne citeema. Eyo, indila kakese, indila. Nudi numona’s, mêmè nciyi mumubiikile to, nêmpetè dibinduluka pa bwalu abu, nudi numona’s. Wamba ne? Wamba ne? [“Inaayi.”] Nwâpèci inaayi? Kadi dikumi ne citeem-... Dikumi ne citeema kî mmwanji kumweneka to. Wamba ne? [“Ne inaayi.”] Karta kaa disambila nomba inaayi kî nkanji kumweneka to, anyi dikumi ne citeema. Muntu yêyè ne twarta atu, bu nwênù mwa kuswa bwelaayi mu mulongo. Anyi, tangila, umone, cidid mwa...udi ne...Mwânà mukese wa mu diboko wawa udi ne karta anyi? Kenketaayi, kabyena...Kî ng’awu nomba to. Inâbânzà ewu udi mwaba ewu udi ne karta anyi, mu

dikalu dya balema edi? Kenketaayi nomba wende awu. Awu—awu nnomba wende anyi? Inăbànzà mu kalaalu kaa babeedi, huh? Badi naaku. Bôbò, kakaadimu mpindyewu. Eyo. Bîmpè. Mpindyewu—mpindyewu, nwênù badi ne twarta twa disambila, nutulamaayi. Netwikale mwa kunukwacila mudimu, ku ngàsà wa Nzambi.

²⁴⁶ Mpindyewu, balunda baanyi, bu mudibi ne edi ndiloolo dya ndekeelu ditwikala naadi, maalaba mmu dyalumingu mu mapingaja, tushaalaayi bapuwe. Mpindyewu angata bupidya bwônsò bùdì naabu ne meeji ônsò—ônsò a macimbakane awu, ubiteeke panshi, udyatepu dikàsà, bu muvwabi amu. Wámbe ne: “Mukalenge Yesu, ndi muswe kuKwitabuuja.” Mbanganyi benza nanku awu? [Disangisha didi dyamba ne: “Amen.”—Muf.] Twasakidilaayi. Nzambi anubeneshe.

²⁴⁷ Mpindyewu muntu nansha umwe kuumuku to. Sombaayi anu talala, biikale biitabuuje. Tangilaayi mu mushindu ewu, nenku mpindyewu tangilaaayi.

²⁴⁸ Dijaadikiibwa dya Nzambi ditu misangu yônsò nkumanya, kudyanjila kumona bikaavwaku, ne kwamba bikaadiku, mudi bwalu abu, anyi ciikalaku. Tudi bamanye aci. Mushindu awu ke uvwa bapofeta bamanyika. Mushindu awu ke uvwa Yesu mumanyike bu Maasiya. Ne Yéyè m'Maasiya umweumwe awu leelu anu muvwaYe musangu awu, kadi kayi ne mubidi wa musunya pa buloba apa to. M'Mupingaje Nyuma Mwîmpè bwa kukwata mudimu ne webe mubidi, wanyi mubidi. Mpindyewu, udi mufwanyine kwikala kuyi mukumbane kwenza cyôci eci to. Tudi bamanye ne, mu Mifundu, kudi umwepele mu lukongo. Kadi, monaayi, kadi nansha nanku nudi mwa kuciitabuuja, ne nudi ne bimwe bintu byûdì mwa kwenza, muntu ne muntu.

²⁴⁹ Anji amba tŭng bu munu wanyi mwa kwangata dipangadika ne, bwalu wôwò kí ndîsù dyanyi to, kawakwikala kabidi munu wanyi? Anji amba tŭng bu diboko edi mwa kwamba ne: “Ncyakujuulaku bintu panshi kabidi to, bwalu mêmè nciyi dîsù to, anyi dici, ncyakwikalaku kabidi diboko to”? Mona's, aci's ncifwanyine kuvwija mubidi wanyi ne bulema.

Ikala cidì Nzambi mukuteeke bwa wêwè kwikala aci.

²⁵⁰ Mmisangu bŭngì kaayi înkadì mêmè mwanyishaanyishe Oral Roberts, Billy Graham, Tommy Osborn!

²⁵¹ Bamwe baa ku bantu abu badi babwela muntwamu bamba ne: “Butumbi kudi Nzambi's we! Itabuujaayi bwalu abu!” Diitabuuja dya bukole bwa nyeke. Kuumuka kuya, kupatuka muntwamu mwikale ne citaleela anu cyebe cya dikema eci.

²⁵² Billy Graham wimana ne mukenji kampanda, wakula ne bantu mu tusunsa tukese, wamba ne: “Angata dipangadika; lwâku ku cyoshelu.” Ushaala kacya wimana anu mwaba awu, kayi mwa kwenda dikwabo dikàsà to.

Awu ne: “Kadi utu wenza nanku bwa cinyi, Billy?”

253 Yèyè ne: “Mukenji wanyi mmumane kuya. Mmufumine kudi Nzambi.” Ncya bushuwa.

254 Yèyè udi ku ekeleeziya wa Sodoma awu, anu menemene civwa ne cya kwenzeka. Dìnà dyende dishiikila ne h-a-m wa ku Abraham, maleeta asambombo; Abraham uvwa yèyè ne mwandamutekete. Nudi numona musanjeela wa ekeleeziya awu, mwamwa mu Baabulona anyi? Cya bushuwa. Kakwena muntu mu ditunga dijima edi udi mukwate ne manza abidi mukenji wa kanyinganyinga awu, bu mudi Billy Graham nansha. Yèyè mmwimanyinepu. Padiye uumuka mwaba awu, udi uya kadya cifweteke cya mufuba wa T kadi kuya kadyolola pa bulaalu, munwe mabeele matotesha ne malt. Ke mudibi menemene.

255 Kadi pakaadibi bikengela ne imanaaku ulwange mvita ne badémóns! Musangu kampanda ku Long Beach, Mwaneetu Jack ne mèmè. . . Tatwèbè uvwa mwimanepu.

256 Ke Mukalenge Fuller uvwa mwimane mwaba awu, Charles Fuller, mwaneetu wa maalu mimpè, mwimane uyiisha mwaba awu. Bantu batwe ku binunu bibidi anyi bisatu muntwamu mu mapingaja amu. Twètù kusòmba bwa kuteeleja mu disangisha dyende adi. Mèmè mvwa mufute bwa kwangata dibalaasa adi, paanyima pende yèyè. Kwimanaye mwaba awu kadi kwenzaye muyiiki mulenga webe wa dikema. Yèyè ne: “Kudiku muntu mwaba ewu muswe kwitaba Kilisto anyi?” Bantu babidi anyi basatu kupwekabo e kulwa bwa dilambula dya bânà baa mu maboko mu byanza bya Nzambi. Mukaji umwepele kwambaye ne uvwa muswe kwitaba cyòci aci. Kuseemenaye kadi kwenza kaadisambila kakese, umwe wa ku balami, kwalukilaye e kusòmba. Balabulangana ku cyanza, kukudimuka kadi kupatuka. Ke cisumbu cyende cya bantu aci, beena mamanya a mu mutu bavwale mvwadilu wa kapelu, bapatuka muntwamu.

257 Ke baanyi paanyi badi babwela aba, ne tunkooci twa bapâle, makalu a balema, bampofo, bikalaba, balema, bilemenda. Padi diitabuuja dyebe disanganyiibwa kumpala kwa cintu kampanda cya mushindu awu!

258 Mpindyewu mwaba ewu, ncinyi cingâlòmbu Kilisto bwa kwikalaye? Nenku mpindyewu beena bupidyà basòmbè ku nyungulukilu aku, bakeba paa kwangwilabo kalema nansha kamwe, nudi numona’s, bakeba kwangulaku kalema nansha kamwe.

259 Vulukaayi ne, abidi adi panshi aa mu Toronto emu, tuvwa biimane muntwamu tuyiisha, tusambidila babeedi. Mèmè kwikala anu mutungunuke ne kuumvwa nyuma wa pabwende; uvwa musòmbèlè lwa ku dyabakaji dyanyi. Mèmè kutungunuka anu ne kumujooja. Kuvwa muntu mulume musòmbè mwaba awu, musumba wa bantu bavwa bamufute mfranga bwa

kulwaye kumpongola lungenyi. Uvwa mwa kuya mu tumpoonyi twa basalaayi ubenzeja bwa kwendelabo pa byanza byabo ne kubulukabo bu mbwa, ne bikwabo; mupongo's. Mémè kuumvwa nyuma mubi awu. Ncivwa mumanye kuvwaye ufumina to. Mémè kutungunuka ne kujooja. Mémè kumona mundidimbi mufiike awu. Mémè kwindila ndambu wa tusunsa. Mémè kwamba ne: “Wèwè mwànà wa Sataana, bwa cinyi dyabulu mmukufomije lungenyi kadi kukutuma ku cintu cya mushindu awu? Bwalu wálu bwa kukika Nzambi, kwela Nyuma wa Nzambi kadyombo, nebapatuke neebe mwambula mwaba ewu.” Yèyè kucibukila panshi anu mwaba awu mu nkwasu uvwaye awu ne ucidi mucibukile panshi. Nwamonu anyi?

²⁶⁰ Katwena tushimakaja bu bayaaya mu ekeleeziya to. Mbanganyi bakaadiku balwe mu masangisha bamone bintu bya mushindu awu byenzeka, biikale bamanye bintu bidi byenzeka? Cya bushuwa. Mmwômò. Vulukaayi ne, nwikale—nwikale ne kaneemu.

Mpindyewu, mûndì ngela meeji, muntu wa kumpala nyèyè ewu. Mmwômò anyi?

²⁶¹ Mpindyewu, monaayi, ngaayiishi, ngänwämbìdì menemene anu bivwa ne cya kwenzeka mu dituku edi. Mpindyewu aci ncimanyinu, piikalaci cyenzeka. Cyôci aci ke civwa cimanyinu, nenku itabuujayi Dîyi didi dilonda cimanyinu. Nwamonu anyi?

²⁶² Mpindyewu muntu mukaji nyèyè ewu. Anu menemene, bweni nwênù beenyi, eci cidì Yone 4, muvwa Mukalenge wetu Yesu mutuutakeene ne muntu mukaji kampanda ku ciinà cya mâyi. Kabavwaku banji kutuutakeena to, kacya baabalela, ke Yèyè kwambila mukaji awu civwa lutatu lwende. Ke yèyè awu kujingulula ne uvwa m'Maasiya. Nutu bamanye bwalu ebu anyi? Ke bwôbò ebu cyakabidi, muntu mulume ne muntu mukaji batuutakeena. Mpindyewu yèyè ewu kî nyèyè mukaji awu to, ne mémè ncyêna Muntu mulume awu to, kadi ucidi anu Nzambi umweumwe awu. Nwamonu anyi? Mpindyewu, Yesu wakamba ne: “Byenzedi bîndì Mémè ngenza nenûbyènzè peenu,” Yone Munsantu 14.12.

²⁶³ Mpindyewu, inäbànà, nciyi mukumanye to, ncyêna nansha ne cingenyigenyi cya ne cyûdi mwimanyine mwaba awu ncinyi to. Ncifwanyine kwikala lutatu lwa ku lubanza. Ncifwanyine kwikala bwa muntu mukwabo. Pämwäpa ngwèwè udi usaama. Pämwäpa cidì...Pämwäpa udi mwimane mwaba awu, udingidija cintu kampanda. Piikalabi ne ncyôci, jandulaaku cidì cyenzeka eci. Wamonu anyi? Pämwäpa udi widikija cintu kampanda. Nansha ciikale cinyi, ncyêna...Udi mwa kwikala mwena kwitabuujayi mushuwashuwale. Aci ncyêna mumanye to, kadi Nzambi mmumanye. Kadi wèwè neumanye ne Yèyè mmukwambile bulelela anyi kî mbulelela, kî mmwômò anyi? Piikalabi ne mbulelela, neubumanye.

264 Mpindyewu, monaaku, ke cidi cikengela bwa diitabuuja dyebe kwenzadi. Mmushindu kaayi ùdi muswe kulwa apa? Mpindyewu muntu yêyè witabuuja ne mbya mafi, lwâku apa wangate mubeedi ewu, lwâku apa wangate bakwabo aba. Nenku pawikala kuyi muswe kucyenza to, kumpiishi to. Nwamonu anyi?

265 Mpindyewu tangilaaku kuneeku, mwaneetu wa bakaji, anu kakese cyanaana. Mpindyewu mêmè ncyêna ne cingenyinyenyi nansha cikese, nansha cintu kampanda pa bidi bikutangila to. Wêwè udi peebe anu muntu mukaji mwimane mwaba awu.

266 Mpindyewu piikala Mukalenge Yesu Kilisto, Mwânà wa Nzambi, Yêyè ûngââjaadiki ne Bible ewu, mulaye ne Yêyè neapingane mu matuku a ndekeelu ne neadibuulule Yêyè mwine mu kaabujima kaa Nyuma Wende. . .

267 Anu mudi Ekeleeziya wenda ubanda; mudiye uumukila ku muntu, kuumukila anu ku makàsà, ubanda ufika ku bibelu, ubanda ufika ku mutu, ne mutu awu mmutu wa mubidi. Nenku Mubidi mmubande, kubangila ku Ekeleeziya wa kumpala, wenda ubanda, mu eci, mu dilongolola, mmubande too ne mpindyewu. Mmupicile mu dibingishiibwa, dijidiibwa, dibatiiza dya Nyuma Mwîmpè. Mpindyewu m’Mutu (Kilisto) ulwa kudi Mubidi, Mubidi wa Kilisto. Yêyè ke Udi mumanye. Cyanza cyanyi kî ncimanye kwenza bwalu to, anu ku bulombodi bwa mutu wanyi. Kadi Yêyè ke Udi mumanye, ke bwa cinyi Yêyè udi Dîyi.

268 Mêmè kî ngudi Dîyi nansha. Mêmè ndi muntu. Kadi, nudi numona, Yêyè udi ukwata mudimu ne mubidi ewu. Bwalu, Yêyè wakafwa bwa kujidila mubidi ewu, bwa Wamona mwa kukwata naawu mudimu, ne kufila dipà. Mbyenze anu bu mudi kukoka biteshi, pashiishe Nyuma Mwîmpè wangata apu.

269 Nenku, bu Yêyè mwa kukuumvwija anyi kukwambila byûdi mwenze, cyûdi muvwile mwaba ewu, anyi cintu kampanda cidi cikutangila, neucîtàbùùjè. Ne bateeleji nebiitabuuje mushindu umweumwe awu anyi? [Disangisha didi dyamba ne: “Amen.”—Muf.] Mukalenge Nzambi aanyishe acifileku.

270 Mpindyewu ndi ngangata nyuma yônsò, muneemu emu, mu bukontononyi bwanyi mêmè, bwa butumbi bwa Nzambi. Mpindyewu sômbaayi talala. Kanwendakanyi eku ne eku to.

271 Tangila kuneeku, katanci kakese cyanaana. “Ntàngile,” bu mwakamba Peetelo ne Yone, paakabwelabo ku ciibi. Mu ngakwilu mukwabo, teya anu ntema ku bîndi ngamba. Wamonu anyi?

Yesu wakeela mukaji awu ndambu wa nkonko. “Ntwàdile mâyi.”

272 Udi umona, ngaayiishi, cintu cimwecimwe aci. Taatu ngudi muntume kuneeku ku—ku Baton Rouge eku. Nyewu ndi apa.

273 Taatu wakamba ne Yèyè uvwa ne dijinga dya kuya ku Samaaleya. Wàkasòmba mwaba awu. Muntu mukaji ke wa nzànzànzà wàkalwa kudiYe. Kwenzaye cimanyinu cimwepele aci pa mukaji awu, kadi cimenga cijima cyakanyingalala. Dishiihangana kaayi didi. . .

274 Nudi nwela meeji ne, Yèyè mwa kwenza cintu cimwecimwe aci, diloolo edi, nudi nwela meeji ne Baton Rouge mujima neanyingalale? Mèmè ndi ngela mpatà bwa aci, kanwena peenu nuumvwa nanku anyi? Ncya bushuwa ne ndi ngela mpatà. Kadi tudi ku matuku a ndekeelu, kudi bubu bwikale bubu kutamba kacya bantu baabumanya.

275 Mpindyewu maalu a mu nsòmbelu webe. Udi mwaba ewu mbwa kukusambidila. Cya bushuwa menemene. Ne udi usaama muminu. Piikala aci cya bushuwa, ela cyanza muulu. Kaciyi anu aci to, kadi kudi muntu kampanda ûdi usambidila. Mmwânà, ne mwânà mwine awu udi ne bya pa muminu. Nenku ke disaama dya pa muminu dya mwânà, mbyûjà bya pa muminu. Udi witabuuja ne Nzambi neamwondope, yèyè pende anyi? Mushwala udi mu cyanza cyebe awu, uwèdi muulu kudi Nzambi awu, bu bujaadiki. . . Mpindyewu kùcyèdi mpatà nansha. Ndaaku ukatentekele mwânà awu mushwala awu. Kwedi mpatà to, ne mwoyi webe wònsò. Nzambi neànwòndòpè nwènù bònsò babidi kabidi anupe bukole bwa mubidi. [Mwaneetu wa bakaji udi wamba ne: “Atumbishiibe! Aleluuyah!”—Muf.] Udi mwa kwenza nanku anyi? [“Yesu! Twasakidila, Yesu!”] Nanku ndaaku, ne Mukalenge ikale neebe. [“Butumbi kudi Nzambi’s we! Aleluuyah!”]

Wetwawu! Katwena bamanyangane to, twètù peetu.

276 Nudi nwtabuuja anyi? [Disangisha didi dyamba ne: “Amen.”—Muf.] Ke cimanyinu ncyôci aci. Mpindyewu Dîyì, didi ne: “Alukilaayi ku Dîyì!”

277 Ncyèna mukumanye to; Yèyè ke udi mukumanye. Bu Yèyè mwa kungambila cintu kampanda cididicutangila, pa dîbà adi newitabuuje ne Dîyì dîngâmbi adi nedishindikiibwa anyi? Dishindikiibwa dyaDi ke dyôdi—ke dyôdi adi. Wamonu anyi? Ngâmbi ne Yèyè mmucyènzè; ke ciprofeta ncyaci. Mpindyewu bu ciprofeta mwa kwenzeka, nenku Yèyè wakamba ne: “Nuciteelejaayi.”

278 Wèwè ewu udi ne mutu ukunyunguluka bikole ûdi usaama, mutu ukunyunguluka. Kabidi udi ne cyûjà cya kansere, ne cyûjà aci cididicutangila. Ncya bushuwa, kî mmwômò anyi? [Mwaneetu wa bakaji udi wamba ne: “Eyo.”—Muf.] Udi witabuuja mpindyewu anyi? [“Eyowa’s, mukalenge.”] Nenku kwata njila ndaaku, wikale mwitabuuje. Nenku, anu mùdi mwitabuuje amu, ke mwakwenzekelabi.

279 Wetwawu! Ncyèna mukumanye to, kadi Nzambi ngudi mukumanye bîmpè. Udi witabuuja ne Nzambi udi mwa

kungambila ntatu yebe anyi? Ntàngile. Udi ne ntatu. Kadi mu bushuwa bwa bwalu udi mwimane mwaba ewu mbwa muntu mukwabo, mwine awu ngunudi bakole nende. Mmwaneenu wa bakaji. Ncya bushuwa. Mpindyewu udi witabuuja ne Nzambi udi mwa kungambila cidì citacisha mwaneenu wa bakaji awu anyi? Neucitàbè anyi? Udi ne disaama dya mwoyi. Ncya bushuwa. Udi witabuuja ne yèyè neondopiibwe mpindyewu anyi? Nanku, bilondeshile diitabuuja dyebe, bikwenzekele nanku.

²⁸⁰ Lwâku, inābànza. Wetwawu! Bu Nzambi mwa kungambila cidì cikutacisha, anyi cyùdì mwenze, anyi cintu kampana, necikwitabuujiye anyi? Udi mumanye ne mèmè ndi. . . Mèmè ncyèna—ncyèna—ncyèna mukumanye to. Ncifwanyine kwikala ngiikadilu Wende mwikale udifwanyikija Yèyè mwine mu mèmè, bilondeshile Dìyì dyakalayaYe. [Mwaneetu wa bakaji udi wamba ne: “Ndi anu ne cya kuciitabuuja.”—Muf.] Udi witabuuja nanku anyi? [“Eyo. Amen.”]

²⁸¹ Wèwè udi mukwabo, udi ne ntatu bu mudi mukaji wa bukole bwebe ebu mufwanyine kwikala naayi, kadi meeji ebe menemene adi bwa muntu mukwabo. Dijinga dyebe kudi Nzambi; udi ukeba Nzambi kaciyi bwebe wèwè mwine to, kadi mbwa muntu mukwabo, mmuntu mulume. Mbayeebe. Yèyè mwine udi ne disaama dya mwoyi. Udi witabuuja ne Yèyè. . . Nzambi neamwondope anyi? Ndaaku, itabuuja cyôci aci. Nanku, bu muwītābùùjì, bikwenzekele nanku.

²⁸² Mpindyewu, nwamonu’s, kuyiisha kwònsò aku, kwa dībà dijima dīmvwà nyiisha adi. Aci, cyònsò civwaku, bantu basatu anyi banaayi ke bāpici, mpindyewu byankoledi bwa kwimana mwaba ewu. Nwamonu anyi? Nwamonu’s, musumba mujima udi umweneka anu lubwicibwici, muneemu mu nyungulukilu emu. Nwamonu anyi? Yesu wakamba ne: “Dikanda ndipatuke mu Mèmè.” Kadi piikala muntu mukaji umwepele, kulenga kwa civwalu Cyende, kupatule dikanda mu Yèyè, wa bwalu Yèyè awu Mwânà wa Nzambi, netwāmbè cinyi bwanyi mèmè ewu, ngènzāmpèkààtù musungila ku ngàsà Wende?

²⁸³ Yèyè wakamba ne: “Byenzedi bīndi Mèmè ngenza nenūbyēnzē peenu. Nenwēnzē *byābūngì* bipite ebi.” Ndi mumanye ne King James udi wamba ne, “bitambe bunene.” Kadi nwènù bangate nkudimwinu wa ku muji, mmwambe ne: “Nenwēnzē *byābūngì* bipite ebi.” Kakwena muntu nansha bamwamba ne nganyi udi mufwanyine kwenza bitambe bunene nansha. Yèyè wakabiisha bafwe, ne Wakiimanyika bufuki, ne kwenza bintu byònsò. Kadi Wakamba ne: “Nenwēnzē *byābūngì* bipite ebi, bwalu Ndi nya kudi Taatu.”

²⁸⁴ “Baa pa buloba kabaakuMmona to; kadi nwènù nenuMmone, bwalu Mèmè. . .” Tangilaayi, “Mèmè,” Mèmè—mèmè mmupinganyi muleeji muntu. “Mèmè nēngikalè neenu, munda mwenu mene.” Dībà adi, kī mmuntu to. N’Kilisto.

285 Ndi ngamba aci, ndinyukulula ndambu mu mushindu kampanda, ndyaluja paanyima mu mushindu kampanda. Udi upatuka too ne kaaba kampanda mu mushindu wa ne paanyima paa katanci. . . Kî mpaudi kuulu *kwaka*, anyi panshi *apa* nansha; mpankacinkaci. Mbanganyi badi bumvwa aci? Ndi mumanye ne nudi—nudi nwela meeji ne nudi nuumvwa. Nansha mêmè, ke mudibi.

286 Nutu bamanye ne bafundi baa tusala ne baprofeta batu anu banyunguluke mitu? Mbanganyi badi bamanye aci?

287 Mbanganyi bakaadi babale William Cowper, mufundi munene wa tusala wa ba-Anglais? Nudi bamanye, wakafunda ne: “Kudi mpokolo mûle ne Mashi, makoka mu mijilu ya Emanuwele.” Paanyima paa yêyè mumane kufunda musambu awu, nutu bumvwe cyakamwenzekela? Mvwaku mwimane pa lukita lwende anu abidi adi panshi aa. Wakakeba bwa kudishipa, ke kudyela mu mâyi e kufwaye.

288 Mbanganyi bakaadiku bumvwe bamba bwa Stephen Foster, wâkapà Amerike misambu yende ya kumpala ya mitambe bwimpè ya bwena mwabo? Uvwa naayi mu mutu kadi kayi naayi mu mwoyi to. Musangu wônsò uvwa disonsodiibwa dimwikila, uvwa mwa kufunda musambu. Pashiishe pavwa disonsodiibwa dimuumuka, uvwa upanga cya didyenzela, nenku uvwa ujimina. Uvwa—uvwa—uvwa mukwacike maala. Nenku ndekeelu wa byônsò paakabangaye kupatuka mu disonsodiibwa adi, kubiikilaye musadidi wende, kwangataye kapaaya kadi kudishipaye. Ncya bushuwa.

289 Tangilaayi Eliya, muprofeta. Kubandaye kuntwaku kadi kubiikila mudilu ufumina mu dyulu; kubiikilaye mvula ufumina mu dyulu dituku dya kumpala adi; kukangaye mauu ne kwenzaye byônsò abi. Pashiishe paalu disonsodiibwa kuumuumuka, kupatukaye e kubwela mu cipeela ne kukebaye bwa kufwa. Ke Nzambi kumusangana, paanyima paa matuku makumi anaayi, mudikokele mu nyongolo. Ncya bushuwa anyi?

290 Tangilaayi Yona, muprofeta. Paanyima paa mumane kufila mukenji wende, wakabanda pa kakuna e kusômbayè, ulomba Nzambi bwa kumulekela kufwaye. Uh-huh. “Lekela musadidi Webe aye byandi mu ditalala.”

291 Bantu kabeena babyumvwa to. To, to, kanwakubyumvwa to. Nansha mêmè ncyèna mwa kubyumvwija to, nansha muntu kaayi mukwabo yônsò. Kwèna mwa kuumvwija Nzambi to. Nzambi katu umanyiibwa ku bukebikibi bwa maalu a mamanya to. Nzambi utu umanyiibwa nku diitabuujja. Tudi tuMwitabuujja. Udi mwa kuumvwija munyi? Nebiikale kabidi diitabuujja munyi, mwaba awu? Tudi tumanya Nzambi nku diitabuujja.

292 Ekeleeziya kaadyakumanyaku mudimu mukole ne dizengela, ne mudimu wa lutatu ne diteeta to, bidi biditacishe bwa

kuMutwala, Mukenji. Yêyè ngudi mumanye. Difutu dyanyi kadyena difumina kudi bantu to.

²⁹³ Tangila kuneeku, inăbânzà. Eyo, lukasalukasa. Mukaji wawa mmubwikila kudi mundidimbi wa lufu. Nzambi kèna ulwa kudi mukaji wawa mpindyewu ewu to, mêmè ndi mwa kumona... Kanwena numona cintu cifiike cidi cilebelele cimunyungulukile cyacya anyi? Yêyè's neafwe, anu mudibi bulelela ne buloba budiku. Anu abidi adi panshi aa, mbakwate fôtô wa cintu cya mushindu wawa, badi nende kumbelu. Udi ne mundidimbi mufiike mulebelele pabwîpî nende. Mmubwikila kudi mundidimbi wa lufu.

²⁹⁴ Inăbânzà mutekete ewu bavwa bamupande. Ne mu diine dimupanda adi, bavwa bapande kansere. Kadi mpindyewu ukaadi upeta ntatu, mishindu yônso ya—ya, ee, ya ntatu mikodyakanangane. Cintu cimwe, udi ne butekete mu mushindu wa kuyi mwa kwimana kuulu to. Cintu cikwabo, ncyà ne mu kalondo kaa mēnyi mudi mupatuka tufina. Mpindyewu, anu bwa umone ne ncyêna ngamba anu cintu kampana bwa kwamba to. Wamonu anyi? Aci ncyà bushuwa. Kadi, inăbânzà, ngangabuka's mmuteete. Ndi mmupa luumu bwa bwalu abu. Kadi, yêyè uvwa ndikwacisha, kadi Nzambi ke dyondopa diine. Wêwè neufwe peebe anu nanku. Yêyè nyawu mwenze mwende pende mwa kwenza. Udi witabuuja anyi? [Mwaneetu wa bakaji udi wamba ne: "Eyo."—Muf.] Vwilabi apa, katanci kakese.

²⁹⁵ Ku mudimu muntuma naawu kudi Nzambi wa Bukole bwônso, munjaadikila kudi Mwanjelo, udi mwaba ewu mpindyewu mu mmwenekelu wa Dikunji dya kapyà, ndi mpiisha démon udi munkaci mwa kwangata mwoyi wa mukaji ewu ewu. Mu Dîna dya Yesu Kilisto. Amen.

Ndaaku, itabuuja mpindyewu. Ne byônso bidi munda mwebe, itabuuja.

²⁹⁶ Wêwè udi ne disaama didi dishipa bantu bapite bûngî kutamba cintu cikwabo cyônso, disaama dya mwoyi. Badi bamba ne ke disaama dya kumpala, kadi kî mmwômô to, mukalenge. Mpekaatu ke disaama dya diitabuuja dya kumpala. Udi witabuuja ne Yêyè udi ne bukole bwa kwondopa disaama dya mwoyi adi ne kukusangaja anyi? [Mwaneetu udi wamba ne: "Ndi mumanye ne Yêyè udi ne bukole abu."—Muf.] Nanku ndaaku, itabuuja nanku awu. Nzambi akubeneshe.

²⁹⁷ Udi wela meeji ne Nzambi udi ne bukole bwa kukwondopa nyima ne kukusangaja anyi? Udi witabuuja nanku ne mwoyi webe wônso anyi? Ndaaku, itabuuja nanku awu, mwaneetu wa bakaji. Utangile bwa kumona cidi cikwenzekela, neŭmwè bîmpè menemene.

²⁹⁸ Binyoka ne disaama dya mwoyi. Kadi udi witabuuja ne Nzambi udi ne bukole bwa kukusangaja anyi? [Mwaneetu wa bakaji udi wamba ne: "Ndi ngitabuuja."—Muf.] Ne mwoyi webe

wônsò? [“Eyowa’s, mukalenge.”] Newitabe cyôci aci? [“Eyowa’s, mukalenge.”] Bilondeshile mushindu ûdi mwitabuuje, mushindu awu ke wikalabi kûdi. Mpindyewu ndaaku, witabuuje cyôci aci ne mwoyi webe wônsò, Nzambi neakusangaje.

²⁹⁹ Wêwè udi peebe ne disaama dya nyima. Udi witabuuja ne Yesu Kilisto udi mwa kukusangaja anyi? [Mwaneetu wa bakaji udi wamba ne: “Eyowa’s, mukalenge.”—Muf.] Ndaaku mpindyewu, witabuuje cyôci aci ne mwoyi webe wônsò. Mêmè kî ngudi mwa kukwondopa to, wamonu’s.

³⁰⁰ Mpàci wa mên̄yi, mutu unyunguluka, udi peebe ne binyoka. Udi witabuuja ne Nzambi udi ne bukole bwa kukusangaja, kukwondopa anyi? Udi witaba cyôci aci anyi? Nanku, ndaaku, witabuuje cyôci aci.

³⁰¹ Bidi bikulama mu citabeela misangu yàbûngì, ukosola. Kadi Nzambi utu wondopa disaama dya mfwenke. Udi witabuuja nanku anyi? [Mwaneetu udi wamba ne: “Eyowa’s, mukalenge.”—Muf.] Udi witabuuja ne Yèyè udi ukusangaja mpindyewu? [“Eyowa’s, mukalenge.”] Nzambi akubeneshe. Twasakidila, bwa diitabuuja dyebe.

³⁰² Amba tûng bu ne ncyêna mukwambile dîyì nansha dimwe, mukutentekele anu byanza cyanaana, uvwa mwa kwitabuuja? [Mwaneetu udi wamba ne: “Eyo.”—Muf.] Lwâku apa. Ndi nkutentekela byanza, mu Dinà dya Yesu Kilisto, ne binyoka abi dikushiile kaaba. Didi dishiya kaaba.

³⁰³ Lwâku. Lwâku, mwaneetu wa bakaji. Udi witabuuja anyi? [Mwaneetu wa bakaji udi wamba ne: “Eyowa’s, mukalenge. Nkaavwa mwondopiibwe kudi Mukalenge kwônsò aku.”—Muf.] Ee, abi’s mbilenga bya dikema. [“Aleluuyah!”] Nanku ndaaku ukadye didya dyebe dya diloolo, nenku cifu cyebe neciikale bîmpè. [“Aleluuyah! Aleluuyah! Aleluuyah!”]

³⁰⁴ Disaama dya nyima bûngì cyanaana, didi dikutacisha kukaadi ntanta mule. Ndaaku, mwikale witabuuja ne udi . . . Ndaaku, mwikale witabuuja ne neûmwè bîmpè, ne Nzambi neakwenzele cyôci aci. [Mwaneetu udi wamba ne: “Nzambi wâcyên̄ji. Amen.”—Muf.] Amen. Ke mudibi. [“Mukalenge atumbishiibwe.”] Mukalenge akubeneshe, mwaneetu. Amen.

³⁰⁵ Disaama dya nsukaadi kî ncintu to, bwa Nzambi kwondopa. Yèyè udi mwa kubasangaja. Udi witabuuja aci anyi? [Mwaneetu wa bakaji udi wamba ne: “Ndi ngitabuuja.”—Muf.] Bîmpè. Itabuuja nanku, ne nda uMwitabuuje mpindyewu ne mwoyi webe wônsò.

³⁰⁶ Ne wêwè peebe udi naadi mu mashi. Udi witabuuja ne Nzambi neakusangaje anyi? Ndaaku, itabuuja nanku ne mwoyi webe wônsò, usangale.

³⁰⁷ Udi witabuuja ne Yèyè wakwondopu pavwa cyôci aci cikulenge apu anyi? Mmukwondope.

308 Disaama dya bakaji. Disaama dya mwoyi. Udi witabuujja cyôci aci anyi? [Mwaneetu wa bakaji udi wamba ne: “Ndi nciitabuujja.”—Muf.] Ndaaku, ikala—ikala mwondopiibwe mu Dîna dya Yesu.

309 Udi witabuujja ne Nzambi udi mwa kukwondopa nyima, ne twonyi twebwe netwikale. . . Akubeneshe! Tungunuka uye anu kumpala.

Mémè nciitu ngondopa to. Mémè ncyêna mwa kwondopa to. Ncyêna mwondopi to.

310 Udi mufwanyine kwela meeji kaayi pãmbiYe bwa nyima wende awu apu, udi witabuujja ne webe mmwondopiibwe, yêyê pende? Bîmpè, ndaaku anu cyanaana, mwikale uciitabuujja, nenku. . . Nda anu cyanaana ùcitàbùùjè, ne mwoyi webe wònsò.

311 Ne webe awu pende, udi witabuujja ne Nzambi udi ukusangaja anyi? Ndaaku, itabuujja cyôci aci, ne mwoyi webe wònsò. Nzambi neakwenzeleci pawikala. . . Bikengela wêwè kuciitabuujja, nansha nanku.

312 Udi witabuujja ne Nzambi neakusangaje, wêwè peebe anyi? [Mwaneetu wa bakaji udi wamba ne: “Mukalenge atumbishiibwe! Ncyà bushuwa ne ndi ngitabuujja.”—Muf.] Bîmpè. Nzambi akubeneshe. Nda anu kumpala cyanaana ne itabuujja ne mwoyi webe wònsò.

313 Lwâku, mukalenge. Dimata ditooke dya kale dimata panshi. Dijandula dya aci ndifwanyine kuleeja disaama dya nsukaadi. [Mwaneetu udi wamba ne: “Disaama dya nsukaadi.”—Muf.] Udi witabuujja ne Yêyè neakusangaje anyi? Tuyaaku ku Kalvariyo bwa dikwela dya mashi mpindyewu. Ku diitabuujja, mu Dîna dya Yesu Kilisto, apeteku mwa kwondopiibwa. Amen. Nzambi akubeneshe, mwaneetu. Itabuujja ne mwoyi webe wònsò. Udi witabuujja anyi? [“Ncilelela menemene.”]

314 Kadi bishi bwa bamwe baa kunudi nwênù bateeleji mpindyewu? Nudi nwiitabuujja ne mwoyi mujima, ne Yesu Kilisto udi umweumwe awu makeelela, leelu, too ne kashidi anyi? Nudi nwiitabuujja aci anyi? [Disangisha didi dyamba ne: “Amen.”—Muf.]

315 Kadi lwa mu citupa *eci*? Inãbànzà mutekete udi musòmbe, udi kacya wantangila wawa, usaama disaama dya bakaji, udi witabuujja ne Nzambi neakusangaje anyi? Mmuvwale anu kankooici kakese kafiike. Bîmpè. Itabuujja mpindyewu, Yesu Kilisto udi ukusangaja. Mbipeepele anu bya menemene.

316 Inãbànzà udi musòmbe anu paanyima peebe menemene awu, ne nsuki mifiike. Wãmbi ne: “Twasakidila, Mukalenge.” Cintu kampanda cyamulengi. Kavwa mumanye ne Cyôci aci nciyi to. Disaama dya kalondo kaa mênÿi dyakushiidi mwaba, wêwè udi musòmbe mwaba wawa naka wawa, paanyima menemene paa inãbànzà wondopiibu katanci aka awu. Pawikala witabuujja ne

mwoyi webe wònsò mwaba awu, inābànzà. Udi witabuuja anyi? Bîmpè, ela cyanza muulu pawikala muswe kuciitaba. Nzambi udi kusangaja.

Kadi bishi bwa ewu lwa patudi tupweka apa, muntu kampana muneemu *emu*?

³¹⁷ Paanyima paapa mu bateeleji mwamwa, mpindyewu ikalaayi mu kaneemu kaa menemene. Kanwendakanyi to. Nwamonu's, masaama aa adi umuka kudi muntu aya kudi mukwabo.

³¹⁸ Kadi bishi bwebe wêwè, mukalenge? Muntu mushindame udi musòmbè apa mu nkwasu ewu? Udi witabuuja anyi? Udi witabuuja ne Nzambi udi mwa kukwondopa anyi? Binyoka, udi kabidi ne lukoso. Udi witabuuja ne Nzambi neondope aci anyi? Udi witabuuja anyi? Bîmpè, udi mwa kupeta cyùdi mulombe aci. “Bu wêwè nanshà mwa kwitabuuja!”

³¹⁹ Udi peebe wela meeji kaayi, inābànzà, wêwè udi musòmbè ku luseke lwende ewu? Udi witabuuja, wêwè peebe anyi? Udi witabuuja? Udi witabuuja ne Nzambi udi mwa kungambila cidi lutatu lwebe? Udi kule bikole naanyi. Wêwè udi witabuuje anu cyanaana mpindyewu. Udi witabuuja ne ndi mukwambile Bulelela anyi? Nanku disaama dyebe dya lwendu lwa mashi aya lubilulubilu adi nedipweke. Udi uciitabuuja anyi?

³²⁰ Uvwa mwele cyanza muulu, wêwè peebe. Uvwa uteeta bwa kumukolesha ku mwoyi. Udi witabuuja ne Nzambi udi mwa kungambila cidi. . . Udi mudileeje ne musangeelu wábungì bwa kumukwacisha yêyè, mpindyewu Nzambi neadileeje ne musangeelu bwa kukukwacisha wêwè. Udi ne lutatu lwa nyuma ludi lukutacisha. Piikalaci ne ncyu bushuwa, nyungisha cyanza cyebe mushindu *ewu*. Bwalu abu nebulongoloke mpindyewu. Yêyè ke udi ubulongolola.

³²¹ Mbanganyi badi biitabuuja? Mbanganyi beenu badi baswe ku- . . . ewu udi kayi mwena Kilisto to, udi ne—ne luumvu lwa ne Yesu Kilisto udi kaaba aka, udi muswe bwa kujuuka kuulu mpindyewu, kwamba ne: “Yesu, mêmè ndi muswe bwa kudifwanyikija bu ngènzàmpèkààtù, udiku Wêwè mwa kwanyisha bwa kumfwila luse ku mpekaatu yanyi anyi?” Juukilaayi kuulu. Nzambi akubeneshe, mukalenge. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Nzambi akubeneshe. Aci cidi. . . Nzambi akubeneshe, wêwè, wêwè, wêwè. Ewu, Yêyè mmukumone. Yêyè mmufunde dînà dyebe paudi wenza nanku apu.

³²² Lwa mu cisasa emu, juukilaayi kuulu, nwāmbè ne: “Mukalenge Yesu, ndi muswe, ndi muswe kufwanyikijiibwa. Ndi muswe luse bwa musuuka wanyi.” Nzambi akubeneshe, mukalenge. “Ndi muswe luse, Mukalenge Yesu.”

³²³ Kwèna mwa kumonaku anyi, mulunda wanyi, ne n'Yêyè ewu mwaba ewu? Nzambi akubeneshe, nsongalume. Nzambi

akubeneshe. Nzambi akubeneshe, nsongakaji. Ke cintu cinene cyûkaadiku mwenze kacya. Mpindyewu muntu kampanda udi kayi mucyenzè to, juuka kuulu, amba ne: “Ndi muswe kufwanyikijiibwa, Mukalenge Yesu. Nyewu ndifwanyikija, diloolo edi.”

324 “Ewu wâtonda mpekaatu wende, neafwidiibwe luse. Ewu udi usokoka mpekaatu wende, kaakutantaku to.”

325 Udi muswe anyi, mu Bwikadi Bwende emu? Nzambi akubeneshe, inăbànzà. Ndi muswe. . . Nzambi akubeneshe. Eyo. Ne Nzambi akubeneshe. Nzambi akubeneshe, mukalenge. Nzambi akubeneshe, inăbànzà. Mukalenge akubeneshe.

326 Udi wamba ne: “Aci cidi ne cidici cyumvwija anyi?” Pankaci paa lufu ne mwoyi, ke dishiilangana ndyadi.

327 Nudi nujingulula Bwikadi Bwende mwaba ewu anyi? Nudi nujingulula aci anyi? Nudi nuumvwa aci anyi? Nwamonu’s, nudi nuBumona, nudi nuBumona bukwata mudimu. Ke Yêyè awu. Ke cyôci aci menemene cyakambaYe ne Neenzè. Nudi nuciitabuujja anyi? [Disangissha didi dyamba ne: “Amen.”—Muf.]

328 Muntu mukwabo âmbe ne: “Ndi muswe kudifwanyikija bu ngènzàmpèkààtù, Mukalenge. Umfwileku luse ku mpekaatu yangi mpindyewu.” Pawikala mumane kjuukila kuulu, ela anu cyanza cyebe muulu cyanaana. Bamwe baa kunudi badi benda balonda cimanu baba, elaaayi. . . Nzambi akubeneshe. Nzambi akubeneshe. Muntu mukwabo, muulu mu cisasa lwa paanyima paapa, âmbe ne: “Ndi muswe kudifwanyikija, Mukalenge Yesu. Ndi ndomba luse, diloolo edi, mu Bwikadi Bwebe bwa Bunzambi, mwikale ngitabuujja ne, Nzambi mene wíkala mwa kundumbulwisha awu, Bwikadi Bwende budi apa mpindyewu. Mmumanye ne Yêyè ngudi munkaci mwa kwakula ne mwoyi wanyi ne mwikale ungambila mûndi mupiile. Ndi muswe kwimanyina kuulu bwa kwamba ne ndi mupiile. Ndi ntonda dipiila dyanyi. Wêwè ngudi munkaci mwa kumpiisha ewu, mu mwoyi wanyi.” Ke bwalu kaayi ndi mwimanyike mulongo wa babeedi. Nzambi akubeneshe. Nzambi akubeneshe.

329 Nudi nwela meeji ne ndi muwimànyike bwa cinyi? Ndi muwimànyike bwalu mvwa mumanye ne aci necyenzeke.

330 Mpindyewu, kudi bakwabo mwaba ewu, kanwena baswe kjuuka anyi? Juukila kuulu wămbè ne Cintu kampanda cidi munkaci mwa kwakula ne mwoyi webe ne, “Udi mupiile.” Nzambi akubeneshe, mukalenge. Nzambi akubeneshe. Nzambi akubeneshe. Nzambi akubeneshe. “Ndi mupiile. Mfwileku luse, Mukalenge. Ndi ndifwanyikija. Ndi mwimane kuulu, Mukalenge, mu Bwikadi Bwebe. Ndi mumanye ne Wêwè udi kaaba aka. Ndi. . . Bikengela Wêwè wikale kaaba aka. Wákamba ne eci neciikale ci—cintu ciwikala mwa Wêwè kwenza. Mpindyewu ndi. . . Ndi mmona cimanyinu, ne ndi mumanye ne baamanyi kungumvwija ne ke cidi ne cya kwikala cimanyinu

cya dituku edi. Ndi ngumvwa Dîyì dyābīikidi bwa kwalukila ku kanyinganyinga adi. S'ke mēmè ewu, Mukalenge. Ndi mwitabuujе cimanyinu. Ndi ngumvwa Dîyì.”

³³¹ Dîyì diikale dyakula neenu mpindyewu! Kudimukaayi, Eyi nwēnù badi batangalake! Kudimuka, Eyi wēwè mutooto mulalakanyi! Kudimuka, Eyi wēwè udibo buumushe pa kaaba keebe! Kudimuka, diloolo edi!

³³² Kwēna muswe kukudimuka anyi? Juukila anu kuulu cyanaana wāmbè ne: “Ndi ndifwanyikija bu ngenzāmpèkààtù, ndomba luse.” Udi musweku kwenza nanku anyi, muntu mukwabo? Nzambi akubeneshe, inābānzà. Nzambi akubeneshe, lwa kuulu kwaka, mwanaanyi wa balume. Pāngikalà mēmè mukupangile, Yēyè kaakukupangila to. Nzambi akubeneshe, inābānzà. Abi mbilenga be. Abi mbilenga be. Muntu mukwabo? Shaalaayi anu . . . Ndi muswe kushaala anu kasunsa kakwabo, bwalu ncidì anu ngumvwa kaabujitu mwaba ewu, nwamonu's. Muntu mukwabo? Nzambi akubeneshe, inābānzà. Ke mushindu wa kubyenza ngwōwè awu. Ke mudibi. Muntu mukwabo wa ne: “Ndi muswe kudifwanyikija, anu kwimanyina kuulu bwa kwamba ne ndi mupiile. Ndi ndomba luse”? Udi muswe kwenza nanku anyi? Lukasalukasa kumpala kwa twētù kutamba kuya kule, juukila kuulu wāmbè ne: “Ndi muswe kudifwanyikija, Mukalenge Yesu.” Nzambi akubeneshe, nsongakaji.

³³³ Udi mumanye, pāmwāpa kumpala kwa wēwè kufika kwebe kumbelu, kadi misangu mikwabo nekukuvwile cibungibungi cya mashika mumpala mwebe amu. Pāmwāpa dinda kampanda ngangabuka nealwe kuteeta dituuta dyebe dya mashi dipatukila mu diboko dyebe dya muteelu, kakuciyi cikwabo cidì mwa kwenzabo to. Pa dībà adi neūmwè mavwala a mashika a lufu akulandala mumpala mwebe amu. Neuvuluke cyūdi mwenze.

³³⁴ Wavuluka ne, kabeena mwa kukujiika mu ciina cipitepite bule to, kabeena ne cidibo mwa kukwenzela nansha cimwe to. Nzambi mmulaye ne: “Nēnkujūule cyakabidi ku lufu, ku dituku dya ndekeelu.” Tangila. “Ewu udi umvwa Mēyì Aanyi ne witabuujа Ewu udi muntume Mēmè, udi ne Mwoyi wa Cyendeleele ne kaakupita ku Cilumbulwidi to, kadi wamanyi kuumuka ku lufu wayi ku Mwoyi.” Muntu akupule Aci piikalaye ne mushindu. Yesu Kilisto ngwākamba Aci. “Ewu udi witabuujа, mbwena kwamba ne, udi umvwa Dîyì Dyanyi ne witabuujа Ewu udi muntume Mēmè, udi ne Mwoyi wa Cyendeleele, kaadyakupitaku ku Cilumbulwidi to, dipiila, kadi mmumane kuumuka ku lufu muye ku Mwoyi.” Bwalu, yēyè mmwitabuujе Mwānà umwepele mulela wa Nzambi, udi Nzambi mujuule ku lufu, kukaadi bidimu binunu bibidi, ne mwikale ne mwoyi mwaba ewu, diloolo edi, mwikale uleeja cyambiibwa Cyende cya dibiika Dyende dya ku lufu.

³³⁵ Kudiku mukwabo udi mufwanyine kujuuka, paanyima paa aci, mukwabo wa wamba ne: “Ndi muswe kuCiitaba. Ndi muswe kuMwitaba” anyi? Nzambi akubeneshe. Nzambi akubeneshe. Abi mbilenga be, nsongakaji. Aci ncintu cya bukitu. Ndi muswe bwa nwènù kumona.

³³⁶ Mvwa mutangile dibiikila kampanda dya ku cyoshelu, anu abidi adi panshi aa mwab’ewu, bantu benda balwa, benda bacyankunya bàzòkà, benda baafunyangana.

³³⁷ Kadi nwamonu meeji matooke mumpala mwa bantu abu anyi? Bakaji batekete abu, nansha mene paanyima paa dibapiisha bwa dibebula dya nsuki, dilaaba dya bilaabu; biikale ne bilaabu abi kwìsù, ne nsuki mibebula ayi, biimane kuulu anu mumwemumwe amu ne: “Ndi ngènzàmpèkààtù. Mfwileku luse, Nzambi.” Aci m’Mamiinu awu miikale mateeka munda amu. Bukênkè mbwenze anu buteemenapu, paawu kubujingulula. Nzambi anubeneshe.

Twinyikaayi mitu yetu mpindyewu.

³³⁸ Ndi muswe bwa mwena kwitabuuja yònsò mwab’ewu, udi mwimane pabwìpi ne muntu wàjuukù awu, utentekele muntu awu cyanza, (mmwòmò nansha?), yêyè wàjuukù awu. Uvwa mujuuke ku luseke lwebe aku. Pawikala mwena Kilisto, mutentekele cyanza, kutentekela cyanza ne: “Mwaneetu wa bakaji, mwaneetu wa balume, nyewu ndi mukutentekele cyanza mpindyewu. Nya’ nkaadi nsambila.”

³³⁹ Taatu wa mu Dyulu, kudi badi mwab’ewu diloolo edi biikale—biikale baKwitabuuje. “Mamiinu makwabo adi amata kumpenga kwa njila,” mùdi Wêwè mwambe, “nyuunyi yidi yilwa yàkùngwija. Makwabo adi apona mu buloba bwa mabwe, ne mu mêmà ne mu mingonga. Kadi makwabo adi akabwela mu buloba bwîmpè, buloba bwa bufuke.” Ne Bwikadi Bwebe bwikale apa, diloolo edi, mbutwishe bààbùngì mwab’ewu diloolo edi ne Wêwè udi Mwânà wa Nzambi, ne Udi ne mwoyi kashidi ne kashidi. Kabidi Wêwè wàkalaya ne, bwalu Wêwè udi ne mwoyi, twètù tudi mwa kwikala peetu ne mwoyi.

³⁴⁰ Mukalenge Yesu, nyewu bajuuke ne biimane kuulu bu bujaadiki bwa ne mbaKwitabuuje. Mpindyewu, Mukalenge, ndi mumanye ne Wêwè newangate kaaba kaabo mu Dituku adi. Bènzèlákù nanku, Mukalenge. Nyewu nKupeeshabu, mu Dîna dya Yesu Kilisto. Anyishaku bwa baye ku ekeleeziya kampanda wa mwîmpè bwa kubatiijibwabo mu dibatiiza dya bwena Kilisto. Anyishaku bwa baadisanga ne musumba kampanda wa mwîmpè wa beena kwitabuuja. Anyishaku bwa buujiibwe ne Nyuma Mwîmpè. Anyishaku bwa biikale bitadi bya bucimunyi bya Evanjeeliyo, mabwe a mushinga mukole ku cifulu Cyebe cya butumbi mu Dituku adi. Nenku bu mêmè nciciyiku mwa kubamona cyakabidi dya kuneeku kwa Dituku dinene adi, anyishaku bwa ngaabamona Dituku adi bu mu cikeena-kumona

aci, bamba ne: “Kwêna mumvuluke to? Muvwa mmu Baton Rouge, diloolo adi, dîngààkajuukà kuulu.” Twènzèlèku nanku, Taatu. M’Beebe Wèwè, mu Dîna dya Kilisto.

³⁴¹ Monaaku, kumpala kwanyi eku, nkuteeka kasheete kaa mishwala, tusabaata tukese, tuubikumba, mishwala, ne tulàmbà, ne tulùlù. Tutu bayiile, mu Bible, ne bavwa bangata pambidi paa Pòlò Munsantu, mishwala ne tulùlù, nyuma ya bukooya yipatuka mu bantu. Mpindyewu, Taatu, tudi bamanye ne twètù katwena Pòlò Munsantu to, kadi Wèwè ucidi anu Nzambi umweumwe awu, nenku ndi ndomba bwa Wèwè kufila bipeta bimwebimwe abi, bu mudi lukongo elu lwitabuuje ne meeji matooke ònsò. Bòbò abu kabavwaku biitabuuje Pòlò ne bwalu m’Pòlò to; bavwa biitabuuje Pòlò bwa Wèwè uvwa mudifwanyikije Wèwè mwine ne Pòlò. Mpindyewu mbiitabuuje cintu cimwecimwe aci diloolo edi, Mukalenge, ne Wèwè ngudi mudifwanyikije munkaci mwetu, diloolo edi. Nenku dîngà dituku, tudi twamba ne. . .

³⁴² Mufundi kampanda uvwa utwambila, ne: “Izaleela uvwa mu njila mutangile ku buloba bulaya, ke Mbû Mukunze kulwa kucyamakana mu njila, bwa kubajikila njila wa ku buloba bulaya.” Mufundi awu kwamba, ne: “Nzambi kupwekeshilaye mèsù mu Dikunji dya Kapyà, ne mèsù a ciiji, paakaseemenaDi kumutu kwa Izaleela. Dyôdi kufila bufofo, mîdimà kudi mwena bupidya, ne bukènkè kudi Izaleela. Nenku paakacyamakana Mbû Mukunze awu mu njila, kukwacikaye bwôwà, kwalukilaye cyanyima, ke Izaleela kusabuka kuya ku buloba bulaya biikale bendela pa buloba bûme.”

³⁴³ Mukalenge Nzambi, pwekshaaku mèsù panshi diloolo edi, uàpwekeshila mu Mashi a Yesu Kilisto, Mwânà Webe. Pândi ntenteka byanza byanyi pa mishwala eyi, paayiteekabo pambidi paa babeedi, swaku bwa Nyuma Mwîmpè, Mukalenge, atangije mèsù pa muntu awu, nenku wanyisheku bwa disaama dyumukepu, ne basabuke baye mu buloba bulaya abu biikale ne bukole bwa mubidi ne makanda. Bwalu, Bible mmmwambe ne: “Kumutu kwa maalù ònsò,” bavwa bajinga ne twètù “tutante mu bukole bwa mubidi.” Twènzèlèku nanku, Mukalenge. Nyewu nyituma, mu Dîna dya Yesu Kilisto. Amen.

. . . mêmè nêndondè,
KwalandombolaYe . . . (twîmbàayi) . . . nêndondè,
Nênye Nende, (mpindyewu Bwikadi Bwende
budi mwab’ewu, tuMukuukwilaayi anu
cyanaana mu musambu, ne kalolo kònsò),
njila mujima.

³⁴⁴ Nudi bushuwa mwa kuwimba mushindu ewu anyi?

KwandombolaYe mêmè nêndondè,
KwandombolaYe mêmè nêndondè,

KwandombolaYe mêmè nêndondè,
 Nênye (bu wêwè mwa kuswa, mpindyewu ela
 cyanza cyebe muulu), Nende njila mujima.

Tujuukilaayi kuulu mpindyewu, elaayi cyakabidi byanza
 byenu muulu.

. . .Nende tuplicila mu budimi,

³⁴⁵ Muntu ne muntu ìmbè mu Nyuma mpindyewu. Diyiisha dya
 dikosa menemene. TuMukuukwilaayi mu Bwikadi Bwende. Yèyè
 utu muswe kwikalabo baMukuukwila.

. . .mu budimi,
 Nênye Nende tuplicila mu budimi,
 Nênye Nende, Nende. . .mujima.

³⁴⁶ Mpindyewu tùwîmbilăyi mu matama. “Ndi mwa. . .”
 Mpindyewu panudi nwenza nanku apu, ndi muswe bwa
 nwenù kulabulaku muntu ku cyanza, kwamba ne: “Nzambi
 akubeneshe, mwena lwendu. Nzambi akubeneshe, mwena
 lwendu,” mushindu awu. Tudi umwe twêtù bônso. Méthodiste,
 ne Baptiste, Presbytérien, beena Mpenta, labulanganaayi bônso
 ku cyanza ne: “Nzambi akubeneshe, mwena lwendu.” Ke citudi
 ncyôci aci: beena lwendu.

. . .mu budimi,

³⁴⁷ Nzambi akubeneshe, mwena lwendu. Nzambi akubeneshe.
 [Mwaneetu Branham ne disangisha mbatungunuke anu ne
 kulabulangana ku cyanza. Katupa kaa mukaba wa mēyi munda
 mutupu—Muf.]

. . .budimi,


Mpindyewu twêlăayi byanza muulu.

Nênye Nende, kaa, Nende njila mujima.

³⁴⁸ Twinyikaayi mitu yetu, mu didipwekesha dyônso, mu
 disambila. Kanupu mwoyi to, mu dinda, kalaasa kaa
 Dyalumingu.

³⁴⁹ Mu mushindu kampana anyi kansanga, ndi anu ngumvwa
 Bwikadi bwa Nzambi bwikale anu bwa bushuwa ebu munda
 mwa mwoyi wanyi. Mbinkolele menemene bwa kuumuka,
 diloolo edi, nansha nanku. Ndi ngumvwa ne Nyuma Mwîmpè
 mmusankishiibwe, diloolo edi. Pâmwăpa netwikale ne
 disangisha dinene maalaba, tumona bantu balwa kudi Kilisto,
 nwamonu’s. Muntu kampana mmudikonke bwa cinyi ncyêna
 mwenze dibiikila dya ku cyoshelu. Ntu ngindila too ne pângikală
 mulombodiibwe bwa kudiyenza. Nwamonu anyi?

³⁵⁰ Ndi mutwishiibwe ne muntu yônso uvwa mwele cyanza
 muulu awu, anyi mujuuke kuulu, ndi mutwishiibwe ne newikale
 ku ekeleeziya kampana wa mwîmpè maalaba, wangata keebe
 kaaba munkaci mwa beena kwitabuuja.

³⁵¹ Patudi biinyike mitu yetu apa, nêndombè mpaasata mwab'ewu bwa kuseemenaye, bu yêyè mwa kuswa, bwa kututangalaja. Nzambi anubeneshe mpindyewu, ne mitu ne myoyi yetu miinyika kumpala kwa Nzambi apa. 

Diyi DYÀ CIMANYINU LUA64-0321E
(The Voice Of The Sign)

Diyiisha edi dya Mwaneetu William Marrion Branham, dyakayiishabo musangu wa kumpala mu Anglais mu diisambombo diloolo, dya 21 ngondo mwisâtù, 1964, mu Cilongelu cya Tulaasa tubandile twa Denham Springs mu Denham Springs, Louisiana, U.S.A., ndyumusha pa mukaba wa mêtù ne dittuta ku cyamu mu kaabujima kaadi mu Anglais. Nkudimwinu wa mu Ciluba ewu mmutuuta ku cyamu ne mwabanya kudi Voice Of God Recordings.

CILUBA

©2016 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org